

RETAKARI ROSANKENATZINIRI PABLO CORINTO-SATZI

Wethataantsi

¹ Naaka Pablo otyaantzimiroi jiroka osankenarentsi. Rotyaantaperore Jesucristo ninatzi, tema iri Pawa kowakaakenawori, ikaimashiretakena. Ari notsipatakari Sóstenes nosankenatzimiro. Iriitake noshiyakagairi iyeki. ² Eeroka nosankenayetzini pikaatzira pipiyowentaari Pawa janta Corinto-ki, rotampatzikashireyetaimi Cristo Jesús. Iri kaimashireyetaimiri pikiteshiretantaari, poshiyakotaari nampiyetawori tsikarikapaini, aakotapiintairori iwairo Awinkatharite Jesucristo, tema irijatzi Pinkathariwentairiri irirori. ³ Onkamintha ineshironkayetaimi Ashitairi Pawa, kameetha risaikakaayetaimi, ari inkantzitemiri eejatzi Awinkatharite Jesucristo.

Riwetharya Pablo ritasonkawentantaitzira

⁴ Niwetharyaapiintari naaka Pawa, tema antawoite ineshironkayetaimi, itsipashiretakagaimiri Cristo. ⁵ Irijatzi kantakaawori pikenkithatakotantariri, piyotakoperotantariri eejatzi. ⁶ Irootake poisokerotantakawori netakarira nokenkithatakotzimiri Cristo. ⁷ Pikanta poyaawentziri ripiye Awinkatharite Jesucristo, tekaatsi kowimotemine ritasonkawentzimi pantawaitantaanariri irirori. ⁸ Iriira kantakayaawone pinkaaryooventantyaariri

irojatzi ripiyantaiyaari, iro eero otzimanta oita riyakowentapaimiri irirori. ⁹ Kisokero rowimi Pawa, iriitake kaimashiretaimiri paapatziyantaariri Itomi Awinkatharite Jesucristo.

¿Ishekitzima pairani irirori Cristo?

¹⁰ Iyekiite, naakotemiri iwairo Awinkatharite Jesucristo noshintsithatemi, nonkante: Paapatziyawakaayetaiya, oshiyawaitaiyaawo apaanime onkantya pikenkithashiretziri, eero pipankenatawakaantawo oitarika. ¹¹ Tema nokemakeri isheninkapaini Cloé ikantapaakena te paapatziyawaka kameetha. ¹² Eenitatsi pitsipayetari janta kantatsiri: “Nokemisziri naaka Pablo.” Itsipa kantayetatsiri: “Iri nokemisziri naaka Apolos.” Itsipa kantatsiri: “Iri nokemisziri naaka Pedro.” Eenitatsi itsipa kantayetanaintsiri: “Nokemisziri naaka Cristo.” ¹³ ¿Ishekitzima pairani irirori Cristo? ¿Naakama kentakowentakemiri? ¿Naakama raakotaitake romitsitsiyaatantaitakemiri? ¹⁴ Iroowa niwetharyaantariri Pawa, ikaminthate naaka omitsitsiyaatemine. Apatzirowa nomitsitsiyaamatsitakeri Crispo, notsipataakeri Gayo. ¹⁵ Arira ontzimakeme ñaantsipooki iroñaaka, inkantaiteme: “Nomitsitsiyaawentakari naaka Pablo.” ¹⁶ ¡Ja! Irijatzira nomitsitsiyaatzitakari Estéfan, notsipataakeri isheninkapaini. Te nokenkithatziro tzimatsirika itsipa nomitsitsiyaatakeri. ¹⁷ Te iro rotyaatantenari Cristo nomitsitsiyaatante, iroowa rotyaatantakenari nonkamantantairo Kameethari Ñaantsi. Te

noshiyakotapaakari tzimatsiri riyorenka
 nokenkithatakotzirowa Kameethari Ñaantsi.
 Tema te nokowi aminaashiwaitya irooperotzira
 ikentakoitantakariri Cristo.

Iri Cristo, ishintsinka Pawa, riyorenka eejatzi

18 Arika ankenkithatakaawetyaari kaari
 oshiretyaawone tsika ikanta ikentakoitakeri
 Cristo, roshiyakaantai masontzi anatyeeeme.
 Irooma aakapaini awisakoshiretai, ayotai
 imaperotatyaga roñaagantakero ishintsinka.

19 Tema rosankenatakotzitaitakari kaari
 oshiretachane, ikantaitake:
 Naapithateri riyorenka ikaatzi yotanewetachari.
 Nompeyapithateri ikenkithashiretanewo ikaatzi
 kenkithashiryaaawetachari.

20 ¿Tsika inkantaiyaaka yotaneri? ¿Tsika inkantaiyaaka yotzinkari ikaatzi yotaantawaitazirori
 irooperotzimotziriri iriroripaini? Pawaga
 omasontyaayetairiri isaawikisatzipaini, ikaatzi
 yotanewetachari pairani. **21** Tema jirikapaini
 yotanewaitashitachari, te riyotziri Pawa.
 Iriima Pawa rimatziro riyotanetzi, inimotakeri
 rowawisaakoshiretairi kemisantañaanetairiri,
 inkantawetya intzimayete oshiyimowetari
 masontzishirenkantsi inatzi riñaane Pawa.

22 Arika iñeero nosheninkapaini Judá-ite
 ritasonkawentantaite, iro inkemisantanyaari
 iriroripaini. Iriima Grecia-thatori, arika inkemer
 roshiyakaantziri iriroripaini yotaneri rinatzi,
 iriitake inkemisantayeteri. **23** Irooma naaka,
 nokenkithatakotanairi Cristo tsika ikanta
 ikentakowentantaka. Irootake ikompitzimotan-
 takariri nosheninkapaini. Iriima Grecia-thatori

roshiyakaakena nomasontzishirewaitatyeeeme.
²⁴ Iro kantzimaitacha aakapaini, ayotaiyini roñaagantairo Cristo Itasorenka Pawa, eejatzi riyorenka. Irojatzi riyoyetairi maawoini ikaimashireyetairi Pawa, onkantawetakya Judá-ite rinatzi, kaaririka Judá-ite, maawoini.
²⁵ Tema Pawa ranairi yotanewaitashitachari atziripaini, okantawetaka jirika atziripaini oshiyimowetakari masontzitaantsi inatzi ikantayetakeri Pawa. Tema Pawa ranairi atziripaini oshekitzimotziri ishintsinka, okantawetaka jirika atziripaini oshiyimotakari te aawyaantanete okaatzi rantawetakari Pawa.

²⁶ Iyekiite, ontzimatye pinkenkithashiryaakotawakero tsikarika pikantaiyani eeroka pairani, tekera ikaimashiretaitzimiita. Te itzimaperotzi yotaneri pikaataiyinira, te itzimaperotzi peewarite, te itzimaperotzi iriiperori pinkathariwentzimiri. ²⁷ Iri kantacha Pawa riyoyaayetairi roshiyakaawetakari atziripaini masontzi rinatzi, iro rowaañaantaiyaariri paata yotanewaitashitaneri. Riyoyaayetairi eejatzi roshiyakaawetakari kaari aawyaawaitaneri, iro rowaañaantaiyaariri paata iriiperoripaini. ²⁸ Ari ikenakairori Pawa riyoyaantariri imanintanewo atziripaini kaari iriiperotzimoyeterine. Iro opoñaantaari opantzimotaari okaatzi imanintawheetakari. ²⁹ Ari ikenakairori Pawa eero itzimanta iita asagaawentawaitachane. ³⁰ Iriira Pawa tsipashiretakagaimiriri Cristo Jesús, rotyaantairi riyotanetakaayetaimi, rotampatzikashireyetaimi, rowameethashireyetaimi. Iri pinakowentaimiri pisakashiwaitantaari

kameetha. ³¹ Irootake rosankenatzitaitantakawori pairani, kantatsiri: Tema tekaatsi pantyaawone rasagaawentaitya apaniroini. Iroowa pantaperotawori asagaawentaiyaawo rantayetziri Awinkatharite.

2

Ikenkithatakoitairi Cristo ikentakoitakerira

¹ Iyekiite, niyaatake pairani nareetzimi nokenkithatakotakemiri Pawa, te noshiyakota-paakari yotanewaitashitaneri, te nonintathawaitashitapaakemi. ² Apatziro nokowaperotanakero nokenkithatakotaimiri Jesucristo, ikentakoitakerira. ³ Te noñiilo inimotena kameetha nisaikimotemi thaawashireri nokantaka. ⁴ Iro kaari oitsinampaantzimi niñaaneyetakari, te oshiyawo riñaane yotanewaitashitachari. Iro kantacha okaatzi niñaaneyetakari, oñaagantakeri Tasorenkantsi, oñaagantakeri ishintsinka. ⁵ Ari okantakari, iro ishintsinka Pawa ikemisantakaantakemiri, kaari riyorenka atziripaini matakayemirone.

Itasorenka Pawa oñaagantakerori

⁶ Iro kantzimaitacha, arika ankenkithatakaayeteri antakishireri, iro kameethatatsi ankenkithatakoteniri yotanetaantsi. Iro kantacha jiroka yotanetaantsi, te oshiyawo okaatzi riyotanewaitashitari isaawikisatzi, okaatzira riyotanewaitashitari pinkathariwetachari iroñaaka. Eerowa rashি rowaatyeero jirikapaini. ⁷ Jiroka yotanetaantsi nokenkithatakotziri naaka, te

riyotakoperoitziro pairani. Oshiyawaitakawo rimanaitatyeerome. Irootake ikowitakari Pawa, iro añaantaiyaawori paata rowaneenkawo.

⁸ Jirikapaini pinkathariwetachari iroñaaka, tekaatsi apaani yotakoperoterone jiroka yotanetaantsi. Arime riyoterome, eeromachee ikentakotakaantzirime Awinkatharite, oshekitzimoperotziri rowaneenkawo. ⁹ Irokantzimaitacha, rosankenatakoitakero pairani, ikantaitake:

Okaatzi ikashaakaakeriri Pawa nintayetairiri irirori,

Anaaperotziro iñaapiintaitziri, ikemapiintaitziri,

Anaaperotzitawo okaatzi anewiyatakari.

¹⁰ Irooma aakapaini, rotyaantakairi Itasorenka Pawa riyotakaantairori. Ari ikantari Tasorenkantsi, riyotakaaperotairi Pawa. ¹¹ Tekaatsi materone riyotakotero ikenkithashiretari itsipa atziri, apatziro riyotziro ishireki irirori. Ari ikantari eejatzi Pawa, tekaatsi yotakoterine ikenkithashiretari apatziro riyotziro irirori ishireki. Jirika Tasorenkantsi, ishire Pawa rinatzi. ¹² Irootake añaantawori inampishiretakagairi Pawa Itasorenka ashireki, iro ayoperotantaiyaawori okaatzi ikashaakaakairi aakapaini akemisantayetaira. Iroowa kaari riyomatsitai issaawikisatzipaini, ¹³ yotaantapiintakerori riyotashiwaitari irirori. Okaatzira akenkithatakotakeri aakapaini iroowa riyotakaayetairi Tasorenkantsi. Iroowa akenkithatakaya yetairiri antakishireri tsika okantakotajaanta ashire.

¹⁴ Iriima ikaatzi kaari antakishireri, te ikemisantziro iriroripaini riyotaantawetari Tasorenkantsi, oshiyimowaitakari masontzishirenkantsi. Te onkantaatsikaitya riyotakotairo irirori, tema te inampishiretantari Tasorenkantsi riyotakaantyaariri. ¹⁵ Irooma aakapaini antakishireri, aritake ayotairo maawoini tsikarika oyeta. Aritake okanta, okantawetaka te ikemathatai isaawikisatzipaini jimpe akantayetanaa aakapaini. ¹⁶ Irootake rosankenatakoitakeri jaka, kantatsiri:
 ¿Tzimatsima yotakoperotairine ikenkithashiretanewo Awinkatharite?

¿Tzimatsima materine riyotairi?

Irooma aakapaini, riyotakaayeetairo ikenkithashiretanewo Cristo.

3

Antawaitainiriri Pawa

¹ Iyekiite, te nimatero nonkenkithatakaayetemi nokemetzirira nokenkithatakairi antakishireri. Oshiyawaitakawo owakerame pawentagaiyaari Cristo. Oshiyawaitakawo eejatzi eenirome pinkaatzininte, ² eenirome inthotagaitemi, te ipaitzimiro kisotatsiri owanawontsi. Tema te okanta pinkemathatairo niyotaawetakemiri, irojatzi pikantayeta iroñaaka. ³ Tekeraata pantakishiretziita. Tema okaatzi piñaanatawakaapiinta, pikisaneentawakaayetaga. ¿Kaarima jiroka rantapiintziri thainkantzinkaripaini? ⁴ Tema eenitatsi, kantatsiri: “Nokemisantziri Pablo.” Itsipa kantayetatsiri: “Nokemisantziri naaka Apolos.” ¿Kaarima jiroka oshiyawori

riñaanaminthatawakaayetari thainkantzinkari-paini?

⁵ ¿Noitaka naaka? ¿Itaka Apolos?
 Naakawetaka apitepaini rimperatanewo Pawa,
 rotyaantakena nonkenkithatakaayetaimi,
 pinkemisantantaiyaari eerokapaini. ⁶ Tema
 naaka noshiyakari pankiwaitatsineme. Iriima
 Apolos roshiyakari oyaatapaakenaneme
 rithamaitakotero nompankiterime. Iriima
 Pawa iriitakeme antakitakaironeme pankirents.
⁷ Te ririiperotzi pankitakerori, ari roshiyari
 thamaitakotakerori. Iriira iriiperotatsi Pawa,
 rantakishiretakaayetaimi. ⁸ Oshiyawaitakawo
 intzimatyeeme rantawaitakaanewo. Rotyaan-
 taitakeri impankiwaite, rotyaantaitake itsipa
 rithamaitaantero. Apatziro ripinamatsitakeri
 okaatzira rantawaitake, roipiyyaitairi inampiki,
 tema te ikowaperota irirori. ⁹ Ari nokantakari
 naakapaini, oshiyawaitakawo naakame
 antawaitziniriri Pawa. Irooma eerokapaini,
 poshiyawaitakawo eerokame pankirentsimashi.
 Poshiyawaitakawo ejatzi eerokame pankotsi.

¹⁰ Naaka oshiyakariri yotzirori riwetsikawaitzi.
 Naaka etakaantanakawo niwetsikakero pankotsi,
 Pawa neshironkatakenari niwetsikantawori.
 Iroatzi ripokantapaakari itsipa thonkaterone
 riwetsikero. Iro kantacha ontzimatye
 ramatsinkawentyaawo rithonkantyaawori
 kameethaini. ¹¹ Iriitakera Jesucristo oshiyawori
 retapiintaitari raayeetziro riwetsikantaityaawori
 pankotsi. Eerowa okanta ripoyaayeetairi.
¹² Arika rowatzikaitakero retapiintaitari,
 aritake rithonkaitairo pankotsi. Kantacha

riwetsikantaityaawo ooro, koriki, mapipaini poreryaayetatsiri. Ari imatakya eejatzi riwetsikantaityaawo inchapanke, kompirosihi, sawooshi. ¹³ Iro kantacha, arika itaiya pankotsi, ari iñagaitero oitarika riwetsikantaitakawori pankotsi. ¹⁴ Irooma riwetsikantaityaaworika mapipaini, eero itaayeta, imaperotatyatokisonetzi riwetsikantaitakawori. Osheki ripinaperoiteri wetsikakerori pankotsi. Ari inkantaiyaari eejatzi roshiyakaawentaitakeri wetsikiro pankotsi, ripinaperoitairi eejatzi. ¹⁵ Irooma riwetsikantaityaaworika pankotsi kaari shenkaatsine itaya, eepichokiinira ripinayeetairi jirika. Ari inkantaiyaari eejatzi roshiyakaawentaitakeri wetsikakerori pankotsi, eepichokiini inkantaiya rawisakoshiretantaiyaari, roshiyaiyaari awisakotatsiri ritaawetyaaame.

¹⁶ ¿Tema piyotaiyini eerokapaini, eeroka oshiyakaawentzi pankotsi? Tema oshiyawaitakemi eerokame itasorentsipankote Pawa, eerokatake risaikashiretantaka Tasorenkantsi. ¹⁷ Arika intzime owaariperoterine oshiyawori itasorentsipankote Pawa, ari rowaariperotairi irirori, tema tasorentsi inatzi ipanko. Iro roshiyakaawentaitzimiri eejatzi eerokapaini.

¹⁸ Paamaiya ramatawitaitzimikari. Eenitatsi janta kantatsiri: “Yotaneri ninatzi.” Iri kameethawetacha jirikapaini inkenkithashiretakotairome oshiyimowetakariri isaawikisatzi masontzishirenkantsi inatzi. Tema jiroka, irootake kantakayaawone riyotanetantaiyaari. ¹⁹ Tema Pawa te opantzimotari roshiyakaantapiintakeri isaawikisatzi yotanetaantsi

inatzi. Iroowa rosankenatakoitakeri pairani, ikantaitake:
Iriira Pawa otaiyakeriri yotanewaitashitachari
riyoshirenkakiini.

²⁰ Rosankenaitake eejatzi kantsiri:

Riyotzitakawo Pawa ikenkithashirewaitari
yotanewaitashitachari.

²¹ Iroowa eero rasagaawentantawo atziripaini
riyomatsiwetari iriroripaini. Irooma
eerokapaini piyotakoyetairo maawoini:

²² Okaatzi niyotaayetakemiri naaka,
irojatzi riyotayitakemiri Apolos, irojatzi
riyotayitzitakemiri Pedro, tsika okantakota
isaawikisato, añaamentotsi, kaamanetaantsi,
awisayetsirsika iroñaaka, awisayetaatsine eejatzi
paata. Arira piyotakoyetairo maawoini jiroka,
oshiyawaitakawo eerokame ashityaawoneme
maawoini, * ²³ tema eerokapaini rashiyetaa
Cristo, iriima Cristo rashitaari irirori Pawa.

4

Rantawaire Otyaantaperoriite

¹ Ari okantari, ontzimatye roshiyakaayeetaina
rimperatanewo Cristo, naakapaini rowake
niyotaantayetairo kaari riyotakoweeta pairani.

² Iro kantacha itzimirika rowaitakeri rantayetairo
oitarika, ontzimatye inkyaryooowentairo
rimatantaiyaawori kameethaini. ³ Niyotzi naaka
piyomaatakaatyaanari nokaataiyinira. Tekaatsi
oitya pikowirika paminakotenawo nantakerorika
kameethari. Tekaatsi oitzimaitya inkowerika

* ^{3:22} Itaitziri jaka “Pedro”, irijatzi iitaitziri “Cefas”.

raminakotenawo jewayetatsiri nampitsiki. Tema te nokenkithashiretawo naaka nimonkatziyaari nokaataiyinira. ⁴ Arikame naminakotya naaka, aamaa tekaatsi noyenakaashitane. Iro kantacha tera naaka aminakowitzachane, iriitakera Awinkatharite aminakoperotainane. ⁵ Eero pimatziro eerokapaini piyomaatyaaari iitarika. Iriira Awinkatharite aminakoyetairine maawoini ripiyairika. Iriitake ooñaawontapairone okaatzi rantaitakeri manaantsikiini. Ari rooñaawontapairo eejatzi okaatzi akenkithashirewetari antayeterime. Ari inkantaiyaari Awinkatharite thaamentakotaimine paata.

⁶ Okaatzi nokenkithatakotakemiri jaka, naaka oshiyakaawentacha notsipatakarira Apolos. Iroowa nokantantzimirori poisokerotantyaawori Osankenarentsipero, tema irootake ikantaitapiintziri: “Eero panaakairo osankenatainchari.” Pipakagairo okaatzi pimonkatziyapiintakena, pasagaawentapiintana pikantaiyini, “Jirika anairiri itsipa.” ⁷ Okaatzi pikantakeri ¿Piñaakama eeroka panayiri itsipapaini? ¿Piyotashitawoma apaniroini kaari riyotagaitzimirri? ¿Litaka pasagaawentantari, apaniroinima piyotanetashita?

⁸ Pasagaawentawaitaka eerokapaini poshiyakotakari pinkatharipaini, ashaa-gantzinkaripaini, aashiryaaaneentziri rowanawo. Oshiyawaitakawo te niyotaimi naakapaini. Pimpinkathariteetatyā iroñaaka nontsipatantemiri naaka pimpinkathariwentante. ⁹ Tema naakapaini Otyaantaperoriite te noshiyari pinkatharipaini, te niriiperowaite.

Oshiyawaitakawo rowamaakaantatyeename Pawa, maawoini raminakowentaitakena rowamagaitanaga, raminakotakena atziripaini eejatzi maninkariite. ¹⁰ Ikenkithashiretakoitakena tekaatsi pantenane nokenkithatakotzirira Cristo. Irooma eerokapaini pikenkithashireta yotaneri pinatzi pikenkithatakotairi irirori. Irooma naaka ikenkithashiretakoitana te naawyaashireperowaite. Irooma eerokapaini ikenkithashiretakoitakemi aawyaashirewaitaneri pinatzi. Osheki ipinkathaitakemi eerokapaini, irooma naaka, temacheeni. ¹¹ Eekero nokemaatsiwaitatyawo, irojatzi nokanta iroñaaka, nitasheneentawaitzi, nomereneentawaitzi, thonkatakowaitakena, rowatsinaawaitaitakena, te otzimi nopanko, ¹² osheki nantawaitake, naakatake antawaiwentacha. Itzimirika kisaneentawitenane, noneshironkatziri naaka. Arika rowatsi-naapookiwaitaitakena, kisashiwaitaneri nokanta. ¹³ Arika inkaweyawaitaitena, noitsimaryaayetziri. Roshiyakagaitakena kaagashi tekaatsi pantenane. Irojatzi ikantaitana iroñaaka.

¹⁴ Te iro nosankenatantawori jiroka nokowi nowaañaashireyetemi, tema nokowatzi nonkam-inaa yetemi, noshiyakotari ipaapateetari ikam-inayiri retakotanewo itomi. ¹⁵ Tzimawetacha osheki kowawetachari Riyotagaimime eerokapaini, iro kantacha te niyote tzimawetacharika kowawetachane raakameethatemi roshiyaaari ashitzimiri. Irootake noshiyakaawentakeri naaka, oshiyawaitakawo iriime Jesucristo matakaakenawone noshiyakotyaaari ashitzimiri,

nokenkithataakaapaakemiro pairani Kameethari Ñaantsi. * ¹⁶ Irootake nosankenatantzimirori jiroka: Poshiyakotaina naaka. ¹⁷ Irootake notyaantantzimiriri iroñaaka Timoteo, noshiyakaakeri iriime netakotanewo notomi, iriitake kyaaryooentakeriri Awinkatharite. Iriitake kenkithataakaapaimirone jimpe ikantakagaana Cristo, niyotaayetairi kemisantzinkaripaini tsikarika risaikayetzi. ¹⁸ Tzimatsira pikaataiyini janta asagaawentachari, ikowaiyini pinkemisanteri irirori. Roshiyakaatzti eero napiitairo nareetaimi. ¹⁹ Iro kantacha intsipaite nipiypaaake, iriirika Pawa kowatsine. Iro noñaantyaawori kyaaryoorika raawayashirewaitzi ikaatzi asagaawaitainchari janta. Aamaashitya riñaawaipookitashitarika. ²⁰ Tema ikaatzi ipinkathariwentairi Pawa, iriitake oñaaganterone raawayashirenka. Te riñaawaipookitashita. ²¹ ¿Arima inimotakemi nareetemi nowasankewaitapaakemirika? Iroowa pikowiri noneshironkatapaakemi, eero noshintsineentawaitapaakemi.

5

Riyakowentatziri antayetzirori koweenkatatsiri

¹ Tema nokemake eenitatsi pitsipatari janta, imayempiwaitake. Rantakero koweenkatatsiri kaari ikemakoitziri rantero thainkantzinkari. Tema rathataakawo irinirothori, iinantari ipaapate. ² ¿Litaka pasagaawaitantari pitsipatari

* **4:15** Kantakotachari jika “osheki”, aamaaka ikaatzi 10,000 atziri.

antakerori jiroka? Te powashiretakotaari piñaakerira rantakero. Tema iro kameethawetachari pomishitowakaanterime jirika atziri.

³ Okantawetaka te nisaikimotemi pinampiki, iro kantacha nokenkithashiretakotapiintakemi oshiyawaitakawo arime antsipatawakaya pinampiki. Irootake poshiyakaantyaawori iroñaaka arime antsipatawakaiya, niyakowenteri jirika atziri. ⁴ Ontzimatye pimpiyotaiyaani, paakoteri iwairo Awinkatharite Jesús, poshiyakayero arime antsipatawakaya janta. Pantero ikantakemiri Awinkatharite, ⁵ pomishitoweri atziri, rowasanketeriita Satanás. Aamaiya arika rawisakoshiretai paata ripiyairika Awinkatharite Jesús.

⁶ Te opantawo pasagaawentawaitya. ¿Tema piyotero ikantaitakeri: “Eepichokiini inawetaka kachopathari, iro kantacha okachotakairo maawoini oshe?” ⁷ Poshiyakayero posokaty-eerome kachopathatakairori oshe, pinkiwairo kameetha. Irootake pantayeteri, poimishitoweri antapiintzirori koweenkatatsiri, rantetawokari. Ontzimatye poshiyaawo oshe kaari kachotatsine, rowapiintaitari roimoshirenkaitzirowa kiteesheri “Anonkoryagaantsi”. Tema ratsipewentakai Cristo roshiyakari oweja rowaitari roimoshirenkaitzirowa Anonkoryagaantsi. ⁸ Iroowa antantyaawori roshiyakaawentaitakeri. Ontzimatye pipakaayetairo koweenkatatsiri, kaariperotatsiri, oshiyakaawentakeri kachotakairori oshe. Ontzimatye ankameethashiretai, ankenkithayetairo irooperotatsiri, oshiyakaawentziri oshe kaari kachotatsine.

⁹ Nosankenatzitakemiro ketziroini, nokantakemi: “Eero paapatziyari antapiintakerori koweenkayetatsiri.” ¹⁰ Nokantayetzimirowa jiroka, te iri nonkantakote kaari kemisantatsine, antayetzirori koweenkayetatsiri, kisakowairentzi, kamatawireri, pinkathatashiwitariri oshiyakaawontsi. Iriime nonkantakoteme, eero okantaatsikaitame pisaikayetaime isaawiki. ¹¹ Iriira nokantakotziri jitashiwaitachari “Iyekiite”. Eero paapatziyari, iriira antapiintakerori koweenkayetatsiri, kisakowairentzi, ipinkathawaitashitari oshiyakaawontsi, ikaweyantawaitzi, ishinkiwaita, ramatawitantzi. Tera okameethatzi pakiyooteri jirikapaini. ¹² Tera rowayeetai aakapaini ayakowenteri kaari kemisantatsine. Iri kameethatatsi ayakowenteri kemisantatsiri atsipatapiintari, rantakerorika kaariperotatsiri. ¹³ Iroowa pookantyaariri jirika atziri antapiintakerori kaariperori. Iriima Pawa iri aminakoyetairine kaari kemisantayetatsine.

6

Te okameethatzi raminakotairo apankenataiyarini kaari kemisantatsine

¹ Arika pinkoshekawakagaiya pikaatzira pikemisantaiyini, te onkameethate raminakotemiro jewatakaantatsiri nampitsiki, kaari kemisantatsine. Iroowa kameethatatsi piyatashitakaiya pikaataiyinira ikiteshiretakagaitami. ² ¿Tema paata eeroka aminakotairine maawoini isaawikisatzipaini? ¿Eeroma

pimatziro piwetsikayetairo pomeentsitzimotzimiri eepichokiini eerokapaini? ³ Tema aakapaini aminakoyetairine eejatzi maninkariite. ¿Eeroma okanta aminakotantero okaatzi añaakotantziri iroñaaka? ⁴ ¿Litaka pishinetantariri raminakotaimi atziripaini kaari pitsipatapiinta pipiyowentari Pawa? ⁵ Ontzimatye pinkaaniwentairo jiroka. ¿Tekaatsima tzimatsine riyorenka, wetsikemirone? ⁶ Jiroka pikantapiintaiyani: Piyaatashitakeri jewari kaari kemisantatsine, pikowakotakeri riwetsikemiro pikoshekawakaaga, pikantawakaapiintaga “Iyekiite”.

⁷ Ari iñagaitzimiri eenitatsi piyenakaashitanewo, piyakowentawaitakeri pitsipatapiintari pinampiki. ¿Litaka kaari pikisashitantawo ikaweyawaitatzimi, ramatawiwaitaitakemi? ⁸ Iroowa pantayetakeri. Eerokatake kantzimoshireneentawakaachari, pamatawitawakaiyakani okantawetaka pikantawaka “Iyekiite”.

⁹ ¿Tema piyotaiyeni, paata eero ipinkathariwentairi Pawa kaariperotatsiri? Paamaawentaiya, otzimikari piyenakaashitanewo. Arira ikanta antapiintzirori koweenkayetatsiri, pinkathayetziriri oshiyakaawontsi, mayempirite, pankenatawakaachari ishiramparinkaki, ¹⁰ koshintzipaini, kisakowaitaneri, shinkiyantzi, kaweyantaneri, kamatawireri. Eerowa iñaayetairo impinkathariwentairira Pawa jirikapaini. ¹¹ Pairani, ari pikantawetakari eerokapaini. Irooma iroñaaka oshiyawaitaawo intzimatyeeme kiwakemiri, ikiteshiretakaitaimi, rotampatzikashiretaimi, tema paakotapiintairi

iwairo Awinkatharite Jesucristo. Iriitake Tasorenkantsi kantakaayetaimiri.

Pimpinkathatantaiyaariri Pawa, oitarika pantayetairi

¹² Eenitatsi kantayetatsiri: “Rishinetaitanawo nantayetero oitarika.” Iro kantacha te opantawo rantaitero maawoini. Aritake okantaweta, rishineyeetairo antayetero oitarika. Iro kantacha te akowiro awathatakotyaawo oitarika rishineyeetairi. ¹³ Eenitatsi kantayetatsiri eejatzi: “Iro otzimantari owanawontsi inimoneentantairi amotziki. Iro otzimantari amotzi, ankemaneeentantyaawo owanawontsi.” Ari okantaweta, iri kantacha Pawa rapitekeroryagairo jiroka, rithonkairo. Iro eero pikantawaitanta eeroka: “Iro otzimantari awatha, añaathatawakaantyaari.” Te ari onkantya. Iro otzimantari awatha ampinkathatantaiyaariri Awinkatharite. Iro itzimantari Awinkatharite animotakaantaiyaariri awatha. ¹⁴ Tema Pawa, eero raperaatziro awatha, aritake rowiriintayetai, roñaagantayetairo ishintsinka, oshiyaiyaari tsika ikanta ipiriinta pairani irirori Awinkatharite. ¹⁵ ¿Tema piyotaiyini iri Cristo ashuyetaawo piwatha? ¿Kantachama aapithatairai rashitari irirori? ¿Ashinewaitziroma awatha amayempiwaitantyaawo? ¡Tera ari onkantya! ¹⁶ ¿Tema piyotaiyini ikaatzi mayempiyetatsiri, oshiyawaitanakawo riwitaatyeyaaawome jiroka, apaani ikantanaa iwathaki? Iro okantziri rosankenaitakeri:

Apaani ikantanaa iwathaki raawakaanaaga.

17 Iriima tsipatanaariri Awinkatharite, riwitaashiretanaatyaaarira, oshiyawaitanaawo apaanime ikantanaawo. **18** Ontzimatye pinkokitapithatero ñaathataantsi. Okaatzi otsipa kaariperoyetatsiri rantaitziri, te iri atziri owashironkaachane arika rantakero, itsipaga atziri rowashironkagaitakeri. Irooma iroorika rantake ñaathataantsi, iriira owashironkaawaitaincha apaniroini iwathaki. **19** ¿Tema piyotaiyini iroowa piwatha oshiyakawori pankotsi risaikantari Tasorenkantsi? Iri Pawa imperayetzimiri. Tera eeroka añaashiwaitachane apaniroini, **20** iri Pawa pinakowentaimiri opoñaantari rashiyetaimi. Pimpinkathattaiyaari Pawa oitarika pantayetairi, eejatzi okaatzi pikenkithashiretari.

7

Ikoshekawakaa aawakaachari

1 Iroñaaka nakemiro okaatzi posampitanari posankenareki: Iro kameethawetacha eero rayi iina atziri. **2** Iro kantacha, ontzimatye piinantayetaiya, pimayempitzikari. Eejatzi tsinanepaini, ontzimatye oimentayetaiya. **3** Ari okameethatzि piñaawakaapiintaiya paawakaayetaga. **4** Okaatzi iinantaitari, te apaniroini ashitawo owatha iriira ashitawori oime. Ari ikantzitari eejatzi iiamentaitari, te apaniroini rashitawo iwatha iroowa ashitawo iina. **5** Iro kaari okameethatanta poshitayero piñaawakaapiintaiya paawakaayetaga. Iro kantacha ontzimatye pinkenkithawaitawakaya

pitziwentantyaawori pamananewo. Pi-matakerorika pitziwentawo pamananewo, ari petanaiyaawo piñaawakaanaiya, iroowa eero rowaariperotantzimi Satanás, tema te piñaakoneta eerokapaini. ⁶ Irootakera jiroka nishinetaantziri, iro kantacha te noshintsineentemiro maawoini pimonkaayetairo jirokapaini. ⁷ Nokowaweta naaka maawoini atziri roshiyakotenawo naaka. Iro kantacha eero rimataitziro jiroka. Tema Pawa rinashitakawo ritasonkawentayetakai maawoini aakapaini. Ritasonkawentake apaanipaini kaari otzimitanta iina, iriima itsipapaini otzimayetzi.

⁸ Niñaanatziri mainaripaini, nokantziri: Iro kameethatatsi pisai kashiwaitaiya eero otzimi piina, poshiyena naaka. Irojatzi nokantzitariri kamayetatsiri iina. ⁹ Irooma terika piñaakonetya, ontzimatye piinantayetaiya. Tema iro kameethatatsiri piinantayetaiya, eero piñaantawo ayimawaitemi.

¹⁰ Niñaanatziro tsinane, aawakaachari, nokantziro: Te onkameethate pookawakaayetaiya. Te naaka ashityaawone niñaane jiroka iriitakera Awinkatharite. ¹¹ Arika pookawakaiya, iro kameethatatsi pisai kashiwaitaiya apaniroini eero pagai itsipa piime. Irooma eerorika, kantacha pipiyashitairi piime. Niñaanatzimi eerokapaini iimentaitari, te onkameethate pookero piina.

¹² Niñaanatziri itsipapaini, nokantziri: Iyekiite, arika piinantyaawo kaari kemisantatsine, ontzimatye poisokerotyaawo, aapatziyakotzimirorika iroori pikemisantziri. Ari nokantziri naaka, tera iri nintakaanterone Awinkatharite jiroka.

13 Ari onkantzityaari eejatzi tsinane jimentariri kaari kemisantatsine, raapatziyakotaworika okemisantziri, ontzimatye oisokerotyaari.

14 Okantawetaka te ikemisantzinkaritzi oime, tasorentsishire ikantanaawo irirori, okantakaakawo iina. Ari ikantzitari eejatzi jinantawori kaari kemisantatsine, tasorentsishire okantanaawo iroori, ikantakaanaawo oime. Irooma arika rookawakaiya, aamaa eero rawisakoshiretai rowaiyanewo. Irooma raawakaana, itasorentsishiretakagairi rowaiyanewo. **15** Iro kantzimaitacha, inkowerika rookawakaiya kaari kemisantatsine, kantacha rimatero. Eejatzi okemetzimaita, tekaatsi shintsithaterine eero rookawakaanta, akantayetairi “Iyekiite”, akantayetairi eejatzi “Choiñaaye”, aayetziriri kaari kemisantatsine. Irooma arika raapatziyawakaiya kameethaini, iroowa ikowiri Pawa. **16** Nokantzimi iinantaitari, te piyotzi aamaa eeroka kantakaantairone rawisakoshiretantaiyaari piime. Eejatzi eeroka iimentaitari, te piyotzi aamaa eeroka kantakaantairone awisakoshiretantaiyaari piina.

17 Ari okantari. Tsika akantayeta asaikayetzi, eero athawaawo owashiñeero jimpe akantapiinta. Iroowa ikowakagairi Awinkatharite, tema ari akantari ketziroini ikaimashiretantakairi Pawa. Irootake nokantapiintziri rantaitero nareeyetarira kemisantzinkaripaini tsika ipiyotaiyani. **18** Thame oshiyakaawentawakero, apaani shirampari tomeshaanitainchari, rashи rowatyeero tsika ikanta. Terika ritomeshaanita ikemisantantakari, tekaatsi oitya ritome-

shaanitantaiyaari. ¹⁹ Tekaatsi oitya aakarika tomeshaaniri, terika atomeshaanita. Iroowa kowaperotachari antayetairo ikowakagairi Pawa. ²⁰ Ari ankantaiyaari maawoini, eero athawaawaitawo owashiñeero tsikarika akantayeta ketziroini ikaimashiretantakairi Pawa. ²¹ Ari okantari eejatzi. Eerokarika noshikaarewo ikaimashiretantaimiri Pawa, eero okantzimoshirewaitzimi. Irooma rothatairorika imperatzimiri ikowi pishitowai, pimatero. ²² Eerokarika ronampitaitanewo ikaimashiretantaimiri Awinkatharite, ontzimatye pinkenkithashiretya risaikakaashi-waitaimi. Eerokarika kaari rimperaitanewo ikaimashiretantaimiri Cristo, oshiyawaitaiyaawo rimperataneme pinatyne Cristo. ²³ Tema Pawa pinakowentaperotaimiri rashitantaimiri, iro kameethatatsiri eero poshiyakotaari inoshikaitanewo, ishintsineentaitziri rimonkaatero ikowakairiri itsipa atziri. ²⁴ Iyekiite, eero athawaawaitawo tsika akantayeta maawoini ikaimashiretantairi Pawa atsipashiretantaariri.

²⁵ Iroñaaka nakayeteri osampikowentzirori mainawopaini. Te otzimi inintakaantairi Awinkatharite tsika okantakota jiroka, iro kantacha nonkantemi okaatzi nokenkithashire-takotawori naaka. Iri Awinkatharite neshironkataanari opoñaantari pawentaagaana naaka. ²⁶ Jiroka okaatzi nokenkithashiretakotawori: Tema asaikantatyaawo iroñaaka jimpe rashironkagaita, iro kameethatatsiri pashi powairo tsika pikantayeta pisaiki iroñaaka. ²⁷ Thame oshiyakaawentawakero: tzimatsirika

eeroka piina, te okameethatzi pookero. Terika otzimi piina, eero pikowakowatzi piinantyaari. ²⁸ Irooma arika piinantakya, tera pantziro kaariperori. Ari okantzitari mainawo jimentachari rakotagaitakeri shirampari, tera antziro kaariperori. Iro kantacha ikaatzi aawakaayetachari, aritake iñaayetakero oita ratsipetyaari. Nokantashitzimira naaka eero piñaantawo oita patsipewaityaari eerokapaini. ²⁹ Iyekiite, irootaintsi imonkaapaitetya. Ari etanakawo iroñaaka, ikaatzi tzimayetatsiri iinapaini, ontzimatye roshiyakagairo terikame otzimayetzi iina. ³⁰ Ikaatzi iraawayetachari, ontzimatye roshiyakagairo tekaatsime oita riraawaitantari. Ikaatzi kimoshirewaitatsiri, ontzimatye roshiyakagairo tekaatsime oita ikimoshirewaitantari. Ikaayetzi amanantayetatsiri oitarika, ontzimatye roshiyakagairo te iri ashityaawoneme. ³¹ Tzimatsirika oshekitzimoyetziri oitarika, ontzimatye roshiyakagairo, te opantaperotawo. Tema irootaintsi ompeyashiwaitaiya okaatzi tzimayetatsiri kipatsiki, okaatzi antapiintawetari.

³² Iroowa nokowakagaimiri eerokapaini eero okantzimoshirewaitantzimi maawoini jiroka. Ikaatzi mainaritatsiri, inkamaityaawo rantairo ikowiri Awinkatharite, rinimotakaantyaariri. ³³ Iriima aawakainchari, ontzimatye rinimotakaayetairo iina, inkenkithashiretakotapiintairo rantaware jaka isaawiki. ³⁴ Piñaakero, apite onkantya roshiretakotapiintaityaari. Ari onkantyaari mainawotatsiri eejatzi ewankawotatsiri, onkamaityaawo ikowiri

Awinkatharite, tsikarika oyeta antayetziri eejatzi okaatzi okenkithashiretari. Irooma aawakainchari, ontzimatye inimotakairi oime, onkenkithashiretakotairo eejatzi antawaire jakä isaawiki. ³⁵ Tera noshintsineentatyemí nokantantzimirori jiroka. Iro kameethatatsiri nonkantayetemiro nominthatakaantemiri pantayetairo kameethatzimotemine, pinkamaitantaiyaariri Awinkatharite.

³⁶ Tzimatsirika ashityaawone rewankawote antawokitaintsine, iñaakerorika kowake aye oime, ontzimatye raakairo, tera okaariperotzi aawakaiya. * ³⁷ Iriima ashitawori ewankawo, kaari kowatsine aawakaiya, kameethatake, tema iro ikowakeri ranteri irirori. ³⁸ Ari okantari. Arika aawakaakyä rewankawote, kameethatake. Irooma eerorika rakotairo, iro kameethaperotatsiri rantero.

³⁹ Jiroka antairi iinantaitari: okowaperotatyä ontsipatapiintaiyaari oime eeniro aawakaaga. Irooma arika inkamapithatakero, isaikashiwaitanaiyaarika iroori, kantacha agai itsipa shirampari, iro kantacha ontzimatye inkemisantzinkarite irirori. ⁴⁰ Iro kantacha eenitatsi nokenkithashiretari naaka, ari onkimoshireperoteri tsinane isaikashiwaitaiyaarika, eerorika agai itsipa oime. Iriira Itasorenka Pawa ñaawaitakaanawori jiroka.

8

* **7:36** Kantakotachari jakä “ashityaawone rewankawote”, irijatzi kantakotachari rakotagaitakeri iinantyaawo ewankawo.

Owanawontsi rashitakagaitariri oshiyakaawontsi

¹ Iroñaaka nakayeteri osampikowentzirori owanawontsi rashitakagaitariri oshiyakaawontsi. Eenitatsi ayotakotzirori jirokapaini, kaari riyoyetzi itsipa kemisantzinkaripaini, kantachama asagaawentyaawo. Eeromaita amatziro jiroka, iro kameethatatsiri etakotaiyaari kemisantzinkaripaini kaari yotakoterone, athotyaakotairo anthaamentashiretakaantaiyaariri. ² Iro itzimantari asagaawentawaitachari, kantatsiri: “Naaka yoperotzinkari.” Iro kantacha tera riyonetzi ikaatzi kantayetatsiri. ³ Iriima Pawa riyoyetziri irirori ikaatzi nintziriri.

⁴ Nakawakeri ikaatzi osampikowentzirori owanawontsi rashitakagaitariri oshiyakaawontsi. Tema ayotaiyini aakapaini iita ikantaitziri oshiyakaawontsi, tekaatsi rañaamento. Apaani ikanta Pawaperori tekaatsi itsipa pawatatsine. ⁵ Niyotzi eenitatsi oshiyakaawontsi jakä isaawiki iwawanetashitaitari, eejatzi jenoki eenitatsi itasorentsitsashitaitari. Iriitake iitashitapiintaitari: “pawa”, iitzitaitari eejatzi “nowinkatharite”. ⁶ Irooma aakapaini, apaani ikanta aitziri “Pawa”. Iriitake ashitairi wetsikayetakerori maawoini. Iri kantakaawori atzimayetantari. Ari roshiyari aitziri “Nowinkatharite”. Iriitakera Jesucristo, riwetsikakagaitakeri maawoini. Iriira kantakaawori añaantaari aakapaini.

⁷ Iro kantacha tzimatsi osheki kaari yotakoterone jiroka. Iroowa itzimantaari

ametashitapiintawori rashitakaari rowanawo oshiyakaawontsi, rowimaitawo owanawontsi. Jirika atziripaini antapiintashitakawori, kemisantzinkari rinaweta, jentashireri ikantayetaka iroñaaka. Arika rowayetyaawo owanawontsi oshiyawaitakawo rantaitziro kaariperori. ⁸ Iro kantacha, tera iro owanawo kantakayaawone raakameethatantairi Pawa. Arika ontzime owanawontsi apinkapiintanewo, te antero kaariperori. Arika atziwaiwetakyaawo jiroka, te owameethashiretai eejatzi. ⁹ Iro kantacha ontzimatye paamaawentaiya, potzikashirewaitzirkari jentashireriite, pinkantayete: “Nisaikashiwaita naaka, kantacha nowayetyaari iiyetarika.” ¹⁰ Pinkenkithashiretakotero oitarika awisatsine raminemirika jirikapaini jentashireri, arika iñeemi poyaawo owanawontsi rashitakaitariri oshiyakaawontsi. Okantawetaka pikantapiintzi eerokapaini: “Niyotzi naaka, te otzimi rañaamento oshiyakaawontsi,” aamaa ari rimatanakero royaari irirori. ¹¹ Iroowa rantantanakawori jentashireri kaariperotzimotziriri. Eerokaga kantakaashitakawori. ¿Tema piiwetari “Iyekiite?” ¿Tema ikamawentayetairi irirori Cristo? ¹² Pimatakerowa eeroka pikaariperotakairi jirikapaini. Powatsiperotakeri, peentashiretakaakeri. Pikaariperotzimotakeri eejatzi eeroka Cristo. ¹³ Irootake eero nowapiintantaarime naaka tsimeri, eero noitzipinaashiretantari ikaatzi noiyetairi “Iyekiite”.

9

Rimonkaataiteniriri Otyaantaperoriite

¹ ¿Eeroma okanta naaka nisaikashiwaitya? ¿Kaarima naaka Otyaantaperori ñaakeriri Jesú, Awinkatharite? ¿Kaarima naaka kemisantakagaimiriri Awinkatharite? ² Eenitatsi itsipa kaari yotenane naaka Otyaantaperori. Irooma eerokapaini piyotaiyini, temma eeroaka ikemisantakaayetai Awinkatharite nokenkithatakoyetaimiri, ari piyotairi naakatake Otyaantaperori.

³ Jiroka nonkanteriri ikaatzi kenkithatakowaitashitanari: ⁴ ¿Tema okameethatzi nakiyootantakowaite naaka? ⁵ ¿Tema okameethatzi ontzime noina kemisantsatsiri? Arikame ontzime, ¿eeroma okameethatzi naanakero pisaiyinira eerokapaini? Iroowa rantapiintziri itsipa Otyaantaperoriite, irojatzira rantapiintakeri irirentzitari Awinkatharite, ejatz Cefas. *

⁶ Piyotaiyini eeroaka, osheki nokamaitakawo nantawaitzi naaka nañaantyaari, irojatzি rantziri Bernabé. ¿Intama naakaite te rishinetaitanawo nipakairo nantaware nonkenkithataantantyaari? ⁷ Pinkenkithashiretakoteri tsika ikanta owayeri tzimatsiri reewarite. ¿Kameethatatsima ripinateri reewarite impantyaariri rowanawo? Arira ikantzitari pankiwaitatsiri, ¿tema okameethatzi rowaiyaawo iwankire? Eejatz ikanzita pirawaitachari, ¿tema okameethatzi inintagaiyaari ipira? †

* **9:5** Ikantitziri jaka “Cefas”, iriitake Pedro. † **9:7** Kantakotachari jaka “ipira”, iri cabra-paini, riraitapiintziri iteni.

8 ¿Pikenkithashiretama eerokapaini okaatzi nokantayetakemiri iro rametaiyarini atziripaini? Irojatzi ikenkithatakoitzitakari Inintakaantaitanewoki. **9** Tema rosankenatzitaka pairani Moisés-ni, kantatsiri:

Arika pantawaitakairi pipira, te okameethatzi ritasheneentawaite.

¿Pikenkithashiretama apatziro pipira roshiretakotari Pawa ikantantakari? **10** ¡Te! Aakayetakera roshiyakaawentaitakeri. Jiroka otsipa roshiyakaawentaitakai ikantaitzi:

Eenitatsirika pankiwaitzinkari, tzimatsirika otekakiwaitatsiri, iroowa rantawaitantawori jiroka rowantaiyaari.

11 Arira okanta ejatzi, naakaga awentaashiretakaayetaimiri, ¿tema okameethatzi pimpayetaina nañaantyaari? **12** Iroowa pantapiintakeniriri itsipapaini janta. ¿Tema okameethatzi pimatzipena naaka? Tera notsiwakakaapiintemiro nonkowakotemi, osheki nokisashitakawo nonkantemiro. Te nokowi neshitakaimiro petanakawo pikemisantairo Kameethari Ñaantsi, nokenkithatakoyetaimiri Cristo.

13 ¿Tema piyotzi eerokapaini rowapiintawo Imperatasorentsitaarewo tzimagaantatsiri rashitakagaitawori tasorentsipango? ¿Tema piyotaiyini, ikaatzi piratsi rashitakagaitariri Pawa taapokimentotsiki rowapiintari Imperatasorentsitaarewo? **14** Ari okantari ejatzi okaatzi ikantanari Awinkatharite, nokaatzira nokenkithayetairo Kameethari Ñaantsi ontzimatye ripinayeetaina nantantyaawori.

15 Te noshintsineentzimi pairani nisaiki-motantzimiri pantayetenawowa. Tera noshintsi-neentzimiro iroñaaka okaatzi nosankenatakemiri. Iroowa nokowaperotake nonkameme naaka, tekera itzimanakeeta iita kantatsine: “Tera iroopero inatzi rasagaawentawaitakari Pablo.” **16** Te nasagaawentawaityaawo nokenkithatakaayetaimiro Kameethari Ñaantsi. Oshiyawaitaaawo iriime Pawa shintsineentanawori nantairo, okantawetaka te naaka kowashiwaityaawone. Eerorika nimatairo jiroka, ¡lkantamatsititana naaka!

17 Naakame kowashityaawone nantero, ari nthotyaakotakerome ripinaitena. Te ari onkantya, tema Pawa owakenari nantairo jiroka. **18** Arira okantakari, tekaatsi oitya noyaawentantyaari pipinayetaina eerokapaini. Tema noshiyakaakero iroome ripinaitenarime okaatzi noñirowa nokimoshirewaitai. Tema iro nokimoshiretantaari iroñaaka, tera nonkowakotaimiro nokenkithatakaayetaimiro Kameethari Ñaantsi. **19** Iroowa nisaikashiwaitantaari, tera intzime iita pinatenane. Iro kantacha naakatake oshiyakaawentachari noshikaarewo. Iroowa nawisakoshiretakaantaariri osheki atziri. **20** Ari nokantzitawo eejatzi nontsipatyaaririka nosheninkapaini Judá-ite, nantzitawo okaatzi rametari iriroripaini, rawisakoshiretantaiyaari. Irojatzi nantzitari nontsipatyaaririka pankenatawori Inintakaantaitanewo, nimonkaatziro naaka eejatzi, okantawetaka niyotzi tekaatsi otsiwakakaawaitenawone nompankenatyaaawo, iroowa rawisakoshire-

tantaiyaari iriroripaini. ²¹ Ari okantzitari, arika nontsipatyaaari kaari kemakoterone Inintakaantaitanewo, noshiyakotari iriroripaini, iroowa rawisakoshiretantaiaari. Iro kantacha tera nipyathatari Pawa, tema ontzimatye nimonkaatero ikantanari Cristo nantero. ²² Ari okantzitari, arika nontsipatyaaari jentashireri, noshiyakotari rantayetziri iriroripaini, iroowa rawisakoshiretantaiaari. Ari nokantzitariri maawoini inashiyetachari atziripaini, iroowa rawisakoshiretantaiaari apaanipaini irirori. ²³ Iroowa nantantawori maawoini jiroka ompoñaantyaari nonkenkithatakaantairo Kameethari Ņaantsi, iroowa nontsipatantaiyaariri ejatzi naaka, ritasonkawentantainari.

²⁴ ¿Tema pikenkithashiretziro jimpe ikanta monkatziyawakaachari rishiyaiyani iñaantaityaariri jimpe itzimi etyaawone rareetya? Apaani inkantya etyaawone rareetya, iriitake ripinaiteri. Arira pinkantaiyaari eerokapaini. ²⁵ Ikaatzi ūnantapiintakawori rimonkatziyawakaantyaari, ontzimatye inkempoyeeya, inkisashityaawo ritziyetyaawo iñaamayetari. Irootake rantantapiintawori jiroka ompoñaantyaari ripinaiteri, ramanthaitantaityaariri shiwithatapo. Iro kantzimaitacha sampiyanero inatzi jiroka. Irooma okaatzi oshiyakaawentachari ripinaitairi aakapaini, eero ithonkaawo. ²⁶ Irootake noshiyakaawentantapiintawori naaka os-hiyawaitawo nishiyatyeeeme, te nitempaawaitizi. Noshiyakaakero noñaashintsiwaityaawome nonkaposante, te nonkaposashiwaityaawo

tampyainka. ²⁷ Okaatzi nokemaatsiwitakawo nitziwentawaitaka, noshiyakaawaitakero nimperatatyeyaaawome nowatha. Irootake nantantayetakawori, eero roshiyakagaitantana ranaakoitziri, iroowa eero aminaashiwaitanta nokenkithatakaantapiintakera.

10

*Ikaminaawentaitantziro okaatzi
ipinkathatashiyeetari*

¹ Iyekiite, eero apeyakotziro iñaayetakeri acharineete. Iroowa ipampithatakeri menkori janta ochempiki. Rimontyaakawo inkaare rowiryaataitapaintziri. ² Ari roñaagantakero rawentaashiretari Moisés-ni, ipampithatakeri menkori, rimontyaakawo inkaare. * ³ Rowaiyakawoni eejatzi acharineete okaatzi ritasonkawentakeri. ⁴ Riraiyakeroni ñaa ritasonkawentakeri shitowaatzimotakeriri shirantaaki. Tema iriitake Cristo tsipashiretarakiri, iri oñaagakeriri ñaa shirantaaki. Iri Cristo oshiyakawori shirantaa eejatzi. ⁵ Iro kantacha, osheki ikaataiyini kaari inimoterine Pawa, irootake ikamagaantantakari ochempiki.

⁶ Okaatzi awisaintsiri, eenitatsi oshiyakaawentakairi, eero oshiyantari iriroripaini, añaamayetyaawo antero kaariperori. ⁷ Te okameethatzi antsipatyaaari itsipapaini thaamentariri oshiyakaawontsi. Tema iro

* **10:2** Rimatakeri oshiyawori omitsitsiyaataantsi, tema arika romitsitsiyaataitya, roñaagantairo eenitatsi rawentaashiretanaari.

rantayetakeri acharineeteni pairani, jiroka ikenkithatakoitakeriri:
Saikaiyakeni atziri, rowawaitaiyani, rirawait-
aiyini.

Ari ikatziyaiyanakani ithaamentawaitaiyani. †

⁸ Te onkameethate eejatzi antayetero koweenkatatsiri. Iro rantayetakeri acharineete, iroowa iñaantakawori ikamagaantake apaani kiteesheri ikaatzi 23,000 atziri. ‡ ⁹ Te okameethatzsi eejatzi owatsimairi Pawa. Iro rantakeri pairani acharineete, iroowa iñaantakawori ratsikayetakeri maanke. §

¹⁰ Te okameethatzsi eejatzi añaawaipookite. Iro rantayetakeri pairani acharineete, iroowa iñaantakawori raperaatakeri iitaitziri “Thonkaatantaneri”. * ¹¹ Maawoini jirokapaini awisaintsiri, irootake roshiyakaawentaitakairi, rosankenatakoitakero ayotantaawori iroñaaka aakapaini, tema asaíkantatyawo ithonkimataawowa kipatsi. ¹² Paamaawentaiya eerokapaini. Eero pikantawaitzi, “Eero nimatziro naaka jiroka,” omapokimikari pantanakero eeroka. ¹³ Iro kantacha piñaakerorika

† **10:7** Okaatzi ikantakoitziri jaka “ithaamentawaitaiyani”, iro rantakeri pairani icharineete Judá-ite riwetsikake oshiyakaawontsi roshiyakaakeri iryaani waaka, iri ikimoshirewentakeri, ipinkathawaitziri oshiyakaawontsi. Paminero eejatzi “Tsika Ikantaitziro Ņaantsipaini” tsika okantakota “Inintakaantitanewo”.

‡ **10:8** Paminero eejatzi “Tsika Ikantaitziro Ņaantsipaini” tsika ikantakota “Balaam”. § **10:9** Paminero eejatzi “Tsika Ikantaitziro Ņaantsipaini” tsika ikantakota “Moisés”.

* **10:10** Paminero eejatzi “Tsika Ikantaitziro Ņaantsipaini” tsika ikantakota “Coré”.

piñaamashirewaityaawo, pinkenkithashiretya tera apaniroini pikanta eeroka rimataker o itsipapaini atziri roitsinampaakero. Kempoyaa rowakai Pawa, eero rishinetzimi iñaamashireperotakaitemiro kaari poitsinampairi. Arika piñaamashirewaitya, iritake Pawa oñaayemirone tsika pinkantya poitsinampaantyaawori, oshiyawaitanakyaawo pishiyapithatatyeerome.

14 Netakotane, piñeeririka itsipapaini ipinkathawaitziro oshiyakaawontsi, poshiyakayero pishiyapithatatyeerome.

15 Tzimatsi iroñaaka nonkantayetemiri, noshiyakaatyeemi yotaneri pinatyeeme nonkamantemiro. Pinkenkithashiretakotero.

16 Tema apatotapiintaiyani irawaitaiyini, akenkithashiretakotziro ramanamanaatakotari pairani Cristo, riraiyakeroni riyotaanewo, ¿Kaarima jiroka withaawakagaantsi, apiyoyetaga oimoshirenkiri Cristo ikapathainkawentakaira? Arika apatotaiyaani akiyootawakaya, ¿Kaarima jiroka withaawakagaantsi, oimoshirenkiro iwatha Cristo, akenkithashiretakotziro ikamawentayetakaira? **17** Arika owayetakyaaawo, intzimawetya osheki atsipatari apiyotaiyani, maawoini owaiyakawoni riwetsikaitakeri apapathawoini. Ari akantayetaari aakapaini, oshiyakawo apapathatatsiri. **18** Ari ikantayetari eejatzi nosheninkapaini Israel-iite, riwith-aawakaayeta eejatzi iriroripaini, ritaayetainiri rashitakaariri Pawa janta taapokimentotsiki. **19** Irootake oshiyawori rantapiintziri itsipasatzi atziripaini ritaayetziniri iwawanewaitashitari. ¿Poshiyakaatzi nokantatzi añaatsi iwawanewait-

ashitakari? ²⁰ ¡Te! Iro kantzimaitacha eenitatsi peyari amawenawaitachari, iri roshiyakairi iwawane, iriitake rashitakaapiintakari rowanawo. Kaari Pawa rashitakaiya rowanawo. Iro kaari nokowakaayetzimi eerokapaini pintsipatyaari powayetaiyaawo rashitakaitariri peyariite, piwithagaarikari iriroripaini. ²¹ Pirakerorika rashitakaitariri peyari, te okameethatzizpirawaitashityaawo arapiintziri oshiretakotari Awinkatharite. Powakaworika rashitakagaitariri peyari, te okameethatzizeejatzipowashiwaityaawo owapiintari oshiretakotari Awinkatharite ²² ¿Akowatziima owatsimairi Awinkatharite? ¿Anairima irirori otzimi ishindsightsinka?

¿Notzikashiretarima pinkathatairiri Pawa?

²³ Jiroka ikantaitzi: “Ishinetaantsitzinantayetero oitarika.” Iro kantacha te opantawo maawoini rantaitero. Imaperowetatyishinetaantsiweta antayetero oitarika. Iro kantacha eenitatsi oita antayetziri kaari ominthashiretakayaarine itsipapainirrantayetairo kameethatatsiri. ²⁴ Te okameethatziankenkithashiretakowaityaawo akowayetziri aakapaini, iro kameethatatsiri añaashintsiwentaiyaawo kameethatzimotziririsitsipapaini. ²⁵ Arika pinkowimate pamanante wathatsi, eero posampikowentziri, pinkante: “¿Ipoñaatyaaawoma jirika wathatsi ritagaitzirira oshiyakaawontsi?” te ari onkene, pamanantatyeeri, poyaari. ²⁶ Tema iri Awinkatharite, ashitari ikaatzi tzimayetatsiri kipatsiki. ²⁷ Ari okantzitari, arika inkaimemi pakiyooteri kaari

kemisantatsine, pakiyooteri pikowirika. Eero posampitantzi pinkante: “¿Ipoñaatyaaawoma jirika wathatsi ritagaitzinirira oshiyakaawontsi?” Poyaari. ²⁸ Irooma eenitatsirika kamantemine, inkantemi: “Jirika wathatsi ipoñaawo tsika ritagaitziniri oshiyakaawontsi,” eero powari. Iroowa pantantakawori jiroka pikenkithashiretakotanakari kamantakemiri, pikenkithashiretanaka eejatzi kantacha rowaariperoshiretante. ²⁹ Tema nokantakemira: “kantacha rowaariperoshiretante,” te iro nonkantakote rowaariperoshiretemi eeroka, iri nokantakotzi kamantakemiri, kantacha rowaariperoshireteri irirori. Aamaaka arika posampitakena naaka, pinkantena: “¿Oitaka nitzitantaayaaariri ikenkithashiretakomatsitana itsipa atziri? ³⁰ Tema niwetharyaawentari Pawa noñaayetziro nowanawo, ¿oitaka nonkenkithashiretakantyaawori onkaate inkiñaanewentakoitenari?”

³¹ Jirokaga nonkantemiri: Arika powawaitya, pinkantashirete: “Eenitatsirika ñeenane nowawaitya, ¿notzikashirewaitzirima eero ipinkathatantaari Pawa?” Ari pinkantzityaawo pirawaiterika, eejatzi pantayetairorika oitarika. ³² Ontzimatye paamaawentaiya eero poitzipinaashiretantari Judá-itetatsiri, kaari Judá-itetatsine, pitsipatapiintari pipiyowentari Pawa, maawoini. ³³ Iroowa nantairi naaka, nopankenatawo ninimotakaantyaariri atziripaini okaatzira nantziri. Te apatziro nantero kameethatzimotanari naaka, nantzitawo kameethatzimotziriri itsipapaini,

ompoñaantaiyaari rawisakoshiretai.

11

¹ Poshiyakotainawo naaka. Iroowa nimatairi naaka noshiyakotaari Cristo.

Owashikayinawo tsinane

² Nothaamentaimi iroñaaka, tema pikamaitakawo okaatzi nametakaakemiri, okaatzi niyotaakemiri. ³ Iro kantacha, jiroka nokowiri piyotero: Iriira Cristo reewaritari shiramparipaini. Iriima shiramparipaini iriira eewaritari tsinane. Iriima Pawa iriira reewaritari Cristo. * ⁴ Okaatzi ametapiintari ashiram-parinkaki, te apashikayinata arika amaña, ejatzti arika onkenkithatakaante. Arikame ampashikayinatyame, te apinkathatziro aito. † ⁵ Irooma tsinane kaari pashikayinatachane amaña, arika onkenkithatakaante ejatzti, tera opinkathatantz. Oshiyakotakawo tsinane ameet-zirori oishi. ⁶ Apaani tsinane kaari kowatsine ompashikayinaty, iweperetyakityaataty.

* **11:3** Kantakotachari jaka “reewaritari”, iroatzi kantakotachari “iitoitari”. Tema ariwaitake okaatzi saikantairi aitoki otzimi kenkithashiretakagairi, akowantari antayetero akowayetziri, oshiyawaitakawo iroome aito jewataineme antayetero oitarika. Kantacha ankante: “Noitotari Cristo.” Iroatzi oshiyakawori arika ankante: “Reewaritaana Cristo.” † **11:4** Kantakotachari jaka “te apinkathatziro aito,” te ayotakoperotziro oita kantakotachari “aito”. Tema tzimatsi kantayetatsiri, iri Cristo oshiyakaawentziri “aito”, oshiyawaitakawo ankanteme “te apinkathatziri Cristo.” Eenitatsi itsipa kantatsiri iro ikantakoitziri “aitopero”. Tema arika ampashikayinaty amaña, oshiyakotakawowa tsinane. Tera apinkathatziri itsipapaini atsipatakari apiyoiyani.

Te ari onkene, eero iweperetyakita, tema riyotaitzi kaaniwentaantsi inatzi, ontzimatye ompashikayinaty. ⁷ Iriima shirampari eero ipashikayinawaita irirori, tema roshiyakari Pawa, iri Pawa owaneenkatakaariri. Irooma tsinane, iri shirampari owaneenkatakaawori.

⁸ Tema pairani owakera riwetsikantakawori Pawa etakawori tsinane, iro raake iwatha shirampari riwetsikantakawori. Irooma owakera riwetsikantakariri Pawa etanakawori shirampari, te rayiro owatha tsinane. ⁹ Ari okanta, owakera riwetsikantawori Pawa tsinane iri riwetsikakeniri shirampari, tema tekaatsi intsipaty. Te iro tsinane riwetsikaiteni shirampari. ¹⁰ Irootake ompashikayinatantyaari tsinane riyotaitantyaawori eenitatsi opinkathatanewo iroori, ompoñaantyaari inimotakairi maninkariite.

¹¹ Te otzimashita tsinane, te itzimashita shirampari eejatzi, apitekeroini rashitari Awinkatharite, ikoityaawakaa apitekeroini.

¹² Tema etanakawori tsinane iwatha shirampari riwetsikaitake. Iro kantacha eejatzi, ikaatzi shirampariyetatsiri iroñaaka, iroowa tsinane owaiyayetairiri. Tema jirika apitekeroini, iriira Pawa kantakaawori itzimayetantari.

¹³ ¿Oitaka pikenkithashiretakotawori okaatzi nokantakemiri? ¿Kameethatatsima tsinanepaini amañaari Pawa eero opashikayinatanta?

¹⁴ Aakapaini ashiramparitzika iroñaaka, te ametawo osanthairo aishi, aritake ankaanitake.

¹⁵ Irooma tsinanepaini, iro owaneenkatakaawori oishi. Oshiyawaitanakawo iroome oishi ompashikayinatyarime. ¹⁶ Tzimatsirika

kowatsine inkisakowaityaawo, jiroka nonkanteriri: Irootake nametapiintakari naaka niyotaantziro. Irojatzi ikantapiintakeri piyowentariri Pawa tsikarikapaini janta.

Aminaashiwaita roimoshirenkaitziro rakiyootanewo Awinkatharite

¹⁷ Iro kantzimaitacha, eenitatsi otsipa nonkantakotemiri, eero nasagaawentzimiro. Tema te okameethatzimotana pantapiintakeri pipiyotaiyanira. Onkaateme kameethatzimotemine, irojatzi rowasankewentaitemiri. ¹⁸ Tema nokemake ikamantaitakena pinashiyetawakaaka janta papatotapiintaiyanira. Iro nonkemisanterime, ¹⁹ tema iro awisapiintatsine jiroka. Eenitatsi kowashiwaitachari inkantaiteri: “Iriiperori jirika.” ²⁰ Ari okantapiinta papatotaiyani eerokapaini pakiyootawakaiyani, aminaashiwaita poimoshirenkiro aitziri “Rakiyootane Awinkatharite.” ²¹ Tema powapiintakawo intsipaite pashitari. Tasheneenta ikantayeta itsipapaini. Tzimatsi itsipa shinkiwaiyetachari. ²² ¿Arima onkantya? ¿Tekaatsima pipankopaini tsika powapiintyaawo pashitari, jimpe pirawaitapiinte? ¿Pimanintatziirima apatotapiintachari ipinkathatziri Pawa? ¿Pithainkatziirima koityaawayatatsiri? ¿Pikenkithashiretama ari nasagaawentakemiro? Eerowa.

*Etantanakawori rakiyootane Awinkatharite
(Mt. 26.26-29; Mr. 14.22-25; Lc. 22.14-20)*

²³ Okaatzi niyotaakemiri pairani tsika okantakota etantanakawori “Rakiyootane

Awinkatharite,” iriitake Awinkatharite yotaakenawori. Jirokaga: Okanta pairani tsireniri tekera ripithokashitaitariita Awinkatharite Jesú, raakero pan,²⁴ riwetharyaawentakawo, itzipetowakero, ikantake: “Poyaawo, nowatha inatzi, tema iro kamawentemine. Irootake pinkenkithashiryaantapiintenari.”²⁵ Ikanta ikaatakerro rowaiyani, raakotakero riraitziri, ikantzi: “Niraa inatzi, irootake shitowaatsine rawisakoshiretantaiyaari osheki atziri. Irootake pantapiintairi arika pirero, arika pinkenkithashiryaakotaina.”²⁶ Arika powapiintaiyaawoni, pirapiintairo eejatzi, iro piyotakaantaiyaariri atziripaini ikamawentayetakai Awinkatharite. Irootake pantapiintairi irojatzi ripiyyantaiyaari Awinkatharite.

*Owaminthawaitashitawori rakiyootane
Awinkatharite*

²⁷ Tzimatsirika owaminthawaitashitawori, iraminthawaitashitawori eejatzi, oshiyawaitakawowa iriime Awinkatharite rithainkawathatakeme, rithainkakero eejatzi riraa.²⁸ Tema iro kameethatatsi, tekera oyaawoota, tekera ireroota, ontzimatye ankenkithashiretakotawakya kameethashiretakairika.²⁹ Tzimatsirika owaminthawaitashitakyaawone, iraminthawaitashitakyaawone eejatzi kaari kenkithashiretakoperoterone oshiyakaawentachari “iwatha”, ari rowasanketakeri.³⁰ Irootake itzimantayetari makowitzatsiri, mantsiyawaitatsiri, eenitatsi eejatzi makoryaayetaintsiri.³¹ Irooma akenkithashireperotanakarika tekera

owanakyaawoota, eero añiiro rowasanketai Pawa. ³² Iro kantacha arika rowasankewaitakai, iñaantatyaira roshiyakagai aakarikame itomipero. Ompoñaantyaari eero rowasanketantai paata, roshiyakagairikari tsika inkantairi isaawikisatzipaini.

³³ Iyekiite, irootake okowantari poyaakotawakaiya eerokapaini, eero posatekasatekawaita arika pimpiyotaiyaani pakiyootawakaiya. ³⁴ Pitasheyatziirika, powanakya pipankoki tekera piyaatanakeeta, eero otzimanta patsipewaityaari papatotaga. Arika nareetakya pinampiki, ari nithotyeemiro niyotaimiro jirokapaini.

12

Tasonkawentashiretaantsi

¹ Iroñaaka nonkantemiro tsika okantakota tasonkawentashiretaantsi. Iyekiite, te nokowi ikompitzimotemi. ² Piyotaiyini eeroka, pairani tekera pikemisantayetanakeeta, eenitatsi piyenakaashitanewo, rominthashiretakaapiintaitzimi piyaatashiteri oshiyakaawontsi kaari ñaawaitatsine. ³ Irootake nonkamantantemirori jiroka: Tzimatsirika kenkithatakaantatsine, inkantapaake “Kamaari rini Jesús,” kaari Itasorenka Pawa ñaawaitakairine jirika. Irooma arika inkante: “Awinkatharite rinatzi Jesús,” iriira Tasorenkantsi ñaawaitakairiri.

⁴ Tema apaani ikanta Tasorenkantsi, iro kantacha tzimatsi osheki jimpe ikenakairo ritasonkawentayetakai antantakawori. ⁵ Apaani ikanta Awinkatharite, iro kantacha tzimatsi

osheki jimpe ikenakairo antawaitantaanariri irirori. ⁶ Apaani ikanta Pawa, iro kantacha tzimatsi osheki jimpe ikenakairo opoñaantari antayetairo oitarikapaini. ⁷ Maawoini aakapaini, eenitatsi oita rantakaayetakairi Tasorenkantsi opoñaantari athaamentakaayetari itsipa kemisantzinkaripaini rantayetairo irirori kameethatatsiri. Ari ikenakairori Tasorenkantsi roñaaganta, rimatakaayetairo oitarika. ⁸ Thame oshiyakaawentawakero, tzimayetatsira ritasonkawentakeri Tasorenkantsi riyotane-tantari. Tzimatsi itsipa ritasonkawentakeri Tasorenkantsi ikenkithatakotantawori okaatzi ikenkithashiretanaari. ⁹ Tzimatsi itsipa ritasonkawentaperotakeri Tasorenkantsi rawentaashireperontantaari. Tzimatsi itsipa ritasonkawentakeri Tasorenkantsi rowashin-chaantantari. ¹⁰ Tzimatsi itsipa rimatakaakeri ritasonkawentante, itsipa rimatakaakeri inkamantantanerite, itsipa rimatakaakeri rapiitairo okaatzi ikamantantakeri Kamantantaneri, iroowa iñaantyaawori iriirika Tasorenkantsi matakaakeriri inkamantanero. Tzimatsi itsipa rimatakaake riñaaawaiyetero otsipasato ñaantsi, tzimatsi itsipa rimatakaake rowagañaanetairo okaatzi ikenkithatakotakeri. ¹¹ Maawoini jiroka irootake ritasonkawentantayetakeri Tasorenkantsi, rantakaantakero oyeterika. Apaani ikanta Tasorenkantsi. Iriitake matzirori ritasonkawentayetakai aakapaini, rantakaayetairo okaatzi ikowiri irirori.

¹² Iroowa awithaawakaantayetaari,
roshiyakaayetai aakame iwatha Cristo.

Tema tsika akantawathayeta, irootake matakaayetairori oitarika. Ari akantayetaari eejatzi aakapaini, inashiyeta antayetairo oitarika. ¹³ Tema apaani ikanta Tasorenkantsi omitsitsiyaatakaayetairi, iro opoñaantari awithaawakaantaari, okantawetaka aakarika Judá-ite, Grecia-thato, noshikaarewo, saikashiwaitachari, maawoini. Oshiyawaitaawo antsipatawakagaiyaame maawoini irapiintairo ñaa kañaanetakaantatsiri, oshiyakaawentakerira Tasorenkantsi.

¹⁴ Pinkenkithashiretakotero tsika okanta awatha. Apaani akanta awathaki, iro kantacha tzimatsi osheki inashitachari antayetziri. ¹⁵ ¿Kantachama iñaawaite aitzi, iñaanatero ako, onkantero: “Te opantana naaka, te noshiyimi eeroka potaiyayetziro oitarika?” ¿Tema opantzitawo aitzi? ¹⁶ ¿Kantachama iñaawaite akempita, iñaanatero oki, onkantero: “Te opantana naaka, te noshiyimi eeroka piñaayetziro oitarika?” ¿Tema opantzitawo eejatzi akempita? ¹⁷ Iroome yoshiitachaneme oki awathaki, ¿arima ankemakeme? Iroome yoshiitachaneme akempita, ¿arima ankemasankatantakyaawo? ¹⁸ Ari okantari awatha. Tema Pawa matzirori riwetsikakero, jimpe okantajaanta ikowakeri irirori riwetsikero, iroowa inashitantari oitarika antayeteri. ¹⁹ Arime oshiyawakayaame maawoini tsika okantayeta awatha, eero awathatawome. ²⁰ Ari okanta, apaani inaweta awatha, iro kantacha tzimatsi osheki inashiyeta oita antantayetawori. ²¹ ¿Kantachama iñaawaite oki, iñaanatero ako, onkantero:

“Naaka pantaperotawori, irooma eeroka, te?”
 ¿Kantachama iñaawaite aito, oshiyakotyaawo
 okaatzi iñaawaitakeri aitz? ²² ¡Eero imatziro!
 Tema okaatzi tzimatsiri awathaki kaari
 pantaperotzimotaine, iroowa pantaperotawori.
²³ Iro akithaatantapiintari, amaniro awathapaini,
 oshiyakaakero pinkatharentsi inatyé janta.
 Okaatzi rimanakoitziri awathaki, oshiyakaakero
 iroome pantaperotyaaawoneme. ²⁴ Irooma
 okaatzi kaari rimanaitapiintzi awathaki
 iñaayetapiintaitziri, tera oshekiperotzi oita an-
 tenirori iroori. Piñaakero, iroowa rantakeri Pawa
 riwetsikantakairori maawoini awatha, okaatzi
 oshiyimowetakairi kaari pantaperotyaaawone,
 irootake oshiyakairi pantaperori inatzi. ²⁵ Eero
 okanta antzipithareero okaatzi awathatari.
 Tema iro kameethatatsiri, anethaaperotairo
 maawoini awathatari. ²⁶ Arika owatsinaawaitya
 eepichokiini awathaki, oshiyawaitakawo
 owatsinaawaityaame maawoini awathaki.
 Arika owaneenkawaitya eepichokiini awathaki,
 kimoshire ankantya maawoiniki awatha.

²⁷ Ari akantayetaari aakapaini akaatzira
 awentaashireyetaari Cristo, oshiyawaitakawo
 aakapaini iwathame Cristo. ²⁸ Jiroka ikan-
 takaayetaari Pawa ikaatzi kemisantayetaatsiri:
 Etanakawori, tzimatsi Otyaantaperori.
 Apitetanaintsiri, eenitatsi kamantantaneriite.
 Mawatanaintsiri, tzimatsi yotaantaneriite.
 Ipoñaapaaka itzimayetanake tasonkawentanta-
 ner, owashinchaantaneri, amitakotantaneri,
 jewatakananteri, kenkithawaiyetzirori
 otsipasato ñaantsi. ²⁹ ¿Maawoinima Otyaanta-

peroritzi? ¿Maawoinima akamantantaneritzi?
 ¿Maawoinima ayotaantaneritzi? ¿Maawoinima
 atasonkawentantaneritzi? 30 ¿Maawoinima
 owashinchaantaneritzi? ¿Maawoinima
 añaawaiyetziro otsipasato ñaantsi? ¿Maawoinima
 owaagañaanewaitzi? 31 Iro kameethatatsiri,
 pinkowaperotai ritasonkawentaitaimi
 pantantyaawori kowaperotachari. Iro
 kantzimaitacha, eenitatsi oita anairori jiroka.
 Ari nonkamantemiro iroñaaka.

13

Iro kowaperotacha etakotantya

1 Thame ankantashitawakya, kantacha naaka niñaawaitero otsipasato ñaantsi riñaawaiyetziri itsipa atziri, nimatzitakyaawome eejatzi riñaawaitziri maninkariite. ¿Tema kameethawaiwetaka jiroka? Iro kantacha terika nimatziro netakotantya nantantawori jiroka, nokameniminthawaitashitakaga. 2 Ari okantari eejatzi, thame ankantashitawakya, Kamantantaneri ninatzi naaka, niyotakotziro kaari riyotakowetaita pairani, nawentaakitar Pawa, ari onkantakyaame roshirinkenawo otzishi rowairo tsikarika janta. ¿Tema kameethawaiwetaka jiroka? Iro kantacha terika netakotantya nantantakawori jiroka, tekaachaajaini nimonkaate. 3 Ari okantari eejatzi, thame ankantashitawakya, arime nompashitantyaawo maawoini shekitzimotanari royaari koityaaawaitatsiri. Ankantashitawakya, osheki natsipewentakari itsipa, nitaawentawaitakari. ¿Tema kameethawaiwetaka jiroka? Iro

kantacha terika netakotantya nimatantakawori jiroka, tekaatsi nonintagaiya.

⁴ Ikaatzzi etakotantachari, tsinampari rinatzi, neshironkatantaneri, te ikisakowaitaneta, te rasagaawaineta, te iñaaperowaineta. ⁵ Ikaatzzi etakotantachari, te ikaariperowaantetzi, te rithañaawaineta, te ikisaneta, te rowapithaantawo imashirenka. ⁶ Ikaatzzi etakotantachari te ikimoshirewentziro rantakerorika kaariperori, iro ikimoshirewentzi riyotakotairo irooperori. ⁷ Ikaatzzi etakotantachari kisashiwaitaneri rinatzi, ikemisantapiintanetzi, oyaakotane ikanta, roisokerotantapiintzi.

⁸ Eero ithonkaawo etakonka. Irooma otsipapaini, aritake ithonkaiya, oshiyawori jiroka: kamantaantsi, riñaawaitantaitawo otsipasato ñaantsi, riyoyeetairo oitarika.

⁹ Tema tekera riyotaitziroota maawoini, tekera ikamantantitziroota tsika okantakota maawoini tzimayetsatsiri. ¹⁰ Irooma arika onkaatapaake monkaatachane, eero akowanairo onkaate peyayetaachane. ¹¹ Ariwaitake akanta atziritzika. Eenirorika eentsitzi, antayetziro okaatzi rantayetziri eentsi, jimpe ikantziro riñaawaitzi, jimpe ikantziro ikenkithashireta, jimpe okanta ipampithashiryaa. Irooma arika antaritanake, eero oshiyakotanaari tsika ikantayeta irirori.

¹² Kantacha oshiyakairo eejatzi tsika okanta aminaatyaaawo kotsirotaki. Eero akoñaatzi kameethaperoini, eero ayotzi jimpe akantawaita. Irooma paata ari ayoperotairi jimpe ikanta Pawa, ari oshiyaiyaari irirori riyoyetai aakapaini.

¹³ Enitatsi kaatatsiri mawa onkantaityaani isaike

eero ithonkanetaawo. Jirokaga mawatatsiri: awentaashirenka, oyaakoneentanka, etakonka. Iroowa kowaperotajaantachari jiroka etakonka.

14

Riñaaawaitantaitawo otsipasato ñaantsi

¹ Pinkyaaryoote petakoyetantya. Pithotyaakotairo ritasonkawentaitemi ompoñaantyaari pantayetairo oitarika. Iroowa pithotyaakoperotajaantai pinkamantantaneritai. ² Arika apatotaiyaani antsipatyaari kemisantzinkaripaini, tzimatsirika ritasonkawentaitake riñaaawaitantyaawo otsipasato ñaantsi, eero akemathatziri, eero ayotziro oita ikantziri. Te iro riñaaawaitantari jirika ankemathateri aakapaini, iriira Pawa kemathaterine. ³ Tzimatsirika ritasonkawentaitakeri inkamantantanerite, iri kenkithatakaine maawoini aakapaini, riwetsikashiretakaantayetairi, inthaamentakaantayetairi, roimoshirenkantairi. ⁴ Ikaatzi ñaawaitzirori otsipasato ñaantsi, apaniroini ithaamentashirewaita. Iriima kamantantaneritatsiri, iriira thaamentashiretakaayetariri kemisantzinkaripaini ikaatzi piyoyetachari. ⁵ Osheki inimotename maawoinime piñaawaitantyaawo otsipasato ñaantsi. Iroowa inimoperotainane maawoinime pinkamantantaneritai eerokapaini. Iroowa anairori otsipa. Iro kantacha tzimatsirika owaagakoñaaneterine ñaawaitzirori otsipasato ñaantsi, iriitake thaamentakayaarine kemisantzinkaripaini ikaatzi piyoyetachari.

6 Iyekiite, thame ankantashitawaka, jatakena nareetemi pinampiki, apatziro niñaawaitantapaakawo otsipasato ñaantsi. ¿Nothaamentashiretakaakemima? Thame ankantashitawaka eejatzi jatakena pinampiki, niyotaakemiro ikemathatakagaanari Pawa, nokenkithashiretakagaimi, nokaman-tayetaimiro, niyotaayetaimiro eejatzi. Iroowa opoñaantanakari pithaamentashiretanaa.

7 Piñaa noshiyakaawentawakemiro eejatzi, oshiyakawo arika ashowiwaite, arika ampiyompiwaite. Eerorika anashitawo oyameninka, irojatzi apiipiinte, tekaatsi yoterone oitarika akowiri omampayaari. **8** Ari okantari eejatzi arika atyoote. Eerorika ikamenitzi kameethaini, tekaatsi yotatsine akaimatziira aate omanatya. **9** Ari pikantaari eejatzi eerokapaini. Eerorika piñaawaithatantawo inkemathaitemiri, piñaawaiminthawaitashitaka. **10** Jaka kipatsiki osheki otsipasato ñaantsi riñaawaitaitziri. Eenitatsi osheki oitarika riñaawaitaitziri. **11** Tzimatsirika ñaanatantanawori otsipasato ñaantsi kaari nokemathatzi, noshiyakaakeri itsipasatzi rinatzi, ari ikantanari eejatzi irirori. Te nosheninkatari kameethaini. **12** Niyotzi naaka, pikowaperotakero eerokapaini ritasonkawentaitemi pinampiki. Iro kantacha ontzimatye pithotyeero pinthaamentashiretakayaari maawoini apatotapiintachari pinampiki.

13 Tzimatsirika ñaawaitzirori otsipasato ñaantsi, ontzimatye inkowakotairi Pawa rimatakaantaiyaariri rowaagakoñaanetairo riñaawaitziri.

14 Arika niwetharyaantyaawo otsipasato ñaantsi

kaari nokemathatzি niñaawaitziro, oshiyakawo nothaamentawaitashitaka, okantawetaka te nokemathatziro okaatzi niwetharyaari.

15 Iro kameethatatsi niwetharyaantyaawo ñaantsi niyotziri, thaamentakaanari eejatzi. Ari nonkantero eejatzi nomampaawentyaari Pawa. **16** Thame ankantashitawakya, eenitatsi piyotainchari rapatotapiintaiyaanira, ari petanakawo eeroka piwetharyaari Pawa, apanirowa pithaamentawaitaka eeroka. Iriima pikaataiyinira te ritasonkawentaitziri inkemantyaawori piñaawaiyetziri. ¿Arima intintaakyaaawo irirori pikantayetakeri eeroka? Te riyotaatsikaitzi kameetharika inkantaiyeni “¡Ari onkantaitaatyeeyaani!” **17** Ariwetaka piwetharyaaka eeroka. Iriima itsipapaini temacheeni piwetsikashiretakayaari. **18** Osheki niwetharyaapiintakari naaka Pawa namanantawo otsipasato ñaantsi, oshiyawaitakawo nanaakotemime pantapiintzirowa eerokapaini.

19 Irooma arika nontsipatyaari nompiyotya itsipapaini kemisantzinkari, te nimatziro. Iro nonkowaperote niñaawaiteme eepichokiini inkemathatantenari, eero nokowaatsikaitzi niñaawaiperotero kaari inkemathaitenari. Irootake nantairi niyotaantantyaari kameethaini.*

20 Iyekiite, eero poshiyari ikenkithashireta eentsi, iro kameethatatsi poshiyari ikenkithashireta antari. Ariwetaka

* **14:19** Ikantakotakeri jak Pablo “niñaawaiteme eepichokiini,” iro oshiyawori inkante “nonkowaperote niñaawaiteme 5 ñaantsi inkemathaiteri, te nokowaatsikaitzi niñaawaite 10,000 ñaantsi kaari inkemathaitenari.”

poshiyakotaari eentsi eero pantantayetawo kaariperori. ²¹ Pinkenkithashiretakotero Inintakaantaitanewo rosankenaítakeri, kantatsiri:

Jiroka ikantakeri Awinkatharite:

Tzimatsi nokowiri nonkanteriri jirika atziripaini, Inkaate notyaanteri, itsipasatzti rinatyे ñaawaitairone otsipasato ñaantsi, iriira kamantaine jirika.

Iro kantacha eero ikemisantaitawakeri.

²² Jiroka oshiyakaawentachari. Matakaga ritasonkawentayetakai añaawaitantyaawori otsipasato ñaantsi, irootake roñaagaitziriri kaari kemisantatsine. Iro imatantakari ritasonkawentayetakai ompoñaantyaari ankamantantanerite, iroowa roñaagaitairi aakapaini akemisantzira.

²³ Thame ankantashitawakya, papatotaiyani maawoini eeroka, maawoini piñaawaitantawo otsipasato ñaantsi. Ari inkyaaapaake kaari kemisantatsine, kaari ritasonkawentaitzi. ¿Eroma ikantapaake: “¡Ishinkiwentatyá jirika!”?

²⁴ Thame ankantashitawakya, papatotaiyani eerokapaini pikamantantzí. Ari inkyaaapaake kaari ritasonkawentaitzi, kaari kemisantatsine. Ari pooñaawonteniri ikenkithashirewaitashitari irirori, iro inkenkithashiretakotantaiyaari, ²⁵ iro ompoñaantyaari inkamantantairo okaatzi ikenkithashirewaitashitakari rimananeki, ari rotziwerowanakya impinkathatanairi Pawa, inkante: “Imapero itsipashiretzimi Pawa eerokapaini jaka.”

²⁶ Iyekiite, jiroka onkaate pantayetairi arika papatotapiintaiyaani. Kantacha romam-

paitaiyaawo Salmo, itsipa riyotaante, itsipa kamantakotairone okaatzi ikemathatakagairiri Pawa, itsipa riñaawaitakaayetairi otsipasato ñaantsi, intzimayetai owaagakoñaanetairone. Tema maawoini pantayetairi ontzimatye piwetsikashiretakagaiyaari itsipapaini.

²⁷ Tzimatsirika ñaawaitantawori otsipasato ñaantsi, eero ishekiperotzi, apatziro inkaate apite, aamaa inkaate mawa. Eero okanta rakisheenkataiyeni jirikapaini, ontzimatye royaawentya rimatantyaawori itsipa. Intzimitya itsipa iita owaagakoñaaneterine.

²⁸ Tekaatsirika owaagakoñaaneterine, ontzimatye imairete tsika papatotaiyakani. Apatziro ramanashiretyaari Pawa, ari onkaate.

²⁹ Ishinetaantsita inkamantante apite, terika mawa. Iriima itsipapaini ontzimatye inkenkithashiretakotero kameethatatsirika okaatzi ikamantantziri. ³⁰ Irooma intzimerika inkemathatakaanairi Pawa, eenirorika ikamantantzi itsipa, kameethatatsi imairetawake inkamantantyaawori otsipa. ³¹ Tema te onkameethate riñaawaitaiyeni apitekeroini.

Retawakyaawo apaani, impoñaapaakya itsipa. Ari onkantya riyotantaiyaari maawoini, thaamentashire inkantayetaiya. ³² Tzimatsirika matakerori ikamantantaperotantanai, iriitake materone iñaakotanetya inkamantante. ³³ Arika rakisheenkataiyeni, kaari Pawa kantakaanterone. Iri Pawa santzikoityaakaantatsiri.

Iroñaaka nonkamantemiro otsipa rametaari roiteshiretaitairi rapatotaiyaani tsikarikapaini:

³⁴ Maire onkantapiintaiya tsinanepaini, eero

ishinetaantsitai iñaaawaitaiyeni. Iro kameethatatsi onkemisantayetai, tema iro iyotaantziri Inintakaantaitanewo. ³⁵ Tzimatsirika oita onkoweri iyotero, osampiteri oime opankoki. Te okameethatzi iñaaawaite tsinane arika rapatotaitya. ³⁶ ¿Poshiyakaatziima eeroka omapokakerori pikenkithatakaantziro riñaane Pawa? ¿Eeroma inimotzimi pantairo rantapiintziri itsipa kemisantzinkarpaini tsikarika janta?

³⁷ Tzimatsirika janta kantatsiri, “naaka kamantantaneri, antakishireri nokanta naaka,” ontzimatye riyote jirika, iri Awinkatharite kantakaawori nosankenatantzimirori jiroka. ³⁸ Terika ikemisantayetzi jirika, eero pikemisantzitari eejatzi irirori. ³⁹ Iyekiite, ontzimatye pithotyaakoperotairo pinkamantantayetai. Eeromaita potzikatzikayetairi ñaawaitzirori otsipasato ñaantsi. ⁴⁰ Pimayetairorika jirokapaini, ñaakotane pinkantawentyaawo, santzikoiteeni pinkantya.

15

Rañaantaiyaari kamayetatsiri

¹ Iyekiite, nokowi nonkenkithashiretakaimiro tsika okantakoweta Kameethari Ñaantsi okaatzi nonkenkithatakakemiri, poisokerotanaari pikemisantaira. ² Iro owawisaakoshiretaimine, eekerorika poisokerotanakityeeyaawo nokenkithatakaakemiri. ¿Aminaashiwaitakama pikemisantayetanairi?

³ Jiroka kowaperoyetachari, iro ikaman-taitakenari naaka, irojatzi nokamantzitzimiri

eerokapaini: Ikamawentai Cristo okantakaantziro akaariperowaitake, rimatakerorimonkaatakaawo okaatzi ikenkithatakotakeriri Osankenarentsiperoki. ⁴ Ikanta ikitaitakeripairani, iro awisawetaka mawa kiteesheri, añagai. Irojatzi ikenkithatakotakeriri Osankenarentsiperoki. ⁵ Irojatzi roñaagantaari Cefas, roñaagaari eejatzi maawoini 12 riyotaanewo. *

⁶ Irojatzi roñaagantapanaantariri aiyetairi “Iyekiite”, 500 ikaataiyini. Eeniro rañaayetzi jirikapaini, tema makoryaayetake apawopaini. ⁷ Irojatzi roñaagantaari Jacobo, roñaagaari eejatzi maawoini Otyaantaperori. † ⁸ Naaka weyaantapaakawo roñaagaana, oshiyawaitakawo naakame impoitatsineme nontzime. ⁹ Tema naakawetaka Otyaantaperori, ranaayetana maawoini itsipa. Te ompantaatsikaityaawo noitya “Otyaantaperori”, tema nowasankewaitakeri kemisantanairiri Pawa, apatowentanaariri tsikarikapaini. ¹⁰ Irokantzimaitacha, te aminaashiwaita ineshironkataana Pawa, tema iriitake kantakaakawori Notyaantaperoritantaari naaka. Naakaga antawaiperotaatsi iroñaaka nanairi itsipapaini, iro kantakaantzirori nantashiwaitakari pairani. Te naaka matashityaawone jirokapaini, Pawa neshironkataanari nimatantaawori. ¹¹ Irootake nosankenatantakemirori okaatzi nokenkithatapiintakeri, irojatzi ikenkithatapiintakeri eejatzi itsipa Otyaantaperoriite. Iroowa pikemisantairieerokapaini.

* ^{15:5} Ikantaitziri “Cefas”, irootake otsipa iwairo Pedro. † ^{15:7} Ikantaitziri “Jacobo”, irootake otsipa iwairo Santiago, irirentzi Jesú.

¹² Tema nokenkithataimiro rowañagaitairi Cristo, rowamaaweetakarira, ¿Oitaka pikantantari: “Eero añaayetai ankamakerika?”
¹³ ¿Poshiyakaatziima te rowañagaitairi Cristo?
¹⁴ Arika onkantyaame, naminaashiwaitaka nokenkithatake, paminaashiwaitaka eerokapaini pikemisantayakeni. ¹⁵ Tema oshiyawaitakawo nonthaiyatyeeyaame nokenkithatakotapiintakeri Pawa, nokantantapiintake: “Pawa owañagairi Cristo, ari inkantayetai eejatzi aakapaini.”
¹⁶ Pikenkithashiryaaweta eerokapaini eero okanta rañaayetai kamayetaintsiri. Arikame onkantyaame, tetya rañaatsikaitaime Cristo irirori. ¹⁷ Terikame rowañagaitairi Cristo, paminaashiwaitaka pikemisantayetai. Eekero pinkaariperoyetatyeeeme, tekaatsi peyakotaimine. ¹⁸ Peyaperowaitakame eejatzi ikaatzi makoryaayetaintsiri, aminaashiwaiwetaka rawentaanaari Cristo. ¹⁹ ¡Inkantamatsitaitai aakapaini! Aminaashiwityaame awentaaawetaari Cristo, aminaashiwityaame oyaakoneentairi, añaaminthawaitashitaka eepichokiini iroñaaaka. Maperokiwaitakaime.

²⁰ Temaita ari onkantya. Rowañagaitairi Cristo ikamawetaka. Iriitake etaawori rañagai tsika inkantayetaiya paata ikaatzi makoryaayetaintsiri. ²¹ Jiroka okantakota: Pairani, eenitatsi rantakeri apaani atziri, iroowa poñaakaantakawori akaamaneyetantari maawoini. Iro kantacha eenitatsi eejatzi apaani atziri poñaakaantaaawori añaayetantaari maawoini akamayewetakaga. ²² Iro akaamaneyetantaari maawoini okantakaantziro asheninkayetaarira

Adán-ni. Iro kantacha, aritake añaayetai maawoini okantakaantziro asheninkashiretaari Cristo. ²³ Jiroka okantakota: Iri Cristo etaawori rañagai. Arika ripiyai paata, rowañaayetapairi ikaatzi rashiyetari irirori. ²⁴ Ari ithonkaiya maawoini, rithonkairi Cristo ikaatzi pinkathariwaitashitachari, ikaatzi otzimimowaitashitari ishintsinka. Iri Cristo kantakayaawone rasshitantairi Pawa paata, matzirori Ipinkathariperoritzi. ²⁵ Tema retaironkatakawo iroñaaka Cristo ipinkathariwentantzi, irojatzi paata imonkaatantapaakyaaari roitsinampaaperotairi iisaneentanewo, rimakoryaayitzitataiyyaari. ²⁶ Weyaantapaakyaaawone iisaneentanewo roitsinampagairi, iroowa “Kaamanetaantsi”, rithonkairo roshiyakagairo atzirime ine. ²⁷ Tema ikenkithatakoitzitakari Cristo, ikantaitake:

Jirika matakerori roitsinampagairi maawoini, rimatairi rimakoryaayitzitantaari.

Iro kantzimaitacha ikaatzi ikantakoitziri jaka “maawoini”, te inkantaite irijatzi Pawa roitsinampaite. Iri Pawa kantakayaawone rimatantyaawori maawoini. ²⁸ Arika impinkathariwentantai Itomi maawoini, iri Pawa pinkathariwentairine eejatzi irirori, tema ari ikenakairo Pawa impinkathariwentantaiyyaawori maawoini tzimayetsatsiri.

²⁹ Eerome rañaayetaime ikaatzi kamayetaitsiri, ¿oitaka romitsitsiyaawentitantariri kamaintsiri?

³⁰ Ari okantari eejatzi, eerome rañagaitaime, ¿tsika oitaka añaantapiintawori ipankenaminthaitai?

³¹ Iyekiite, ¿Pithainkanama? ¿Kaarima naaka

thaamentawentaimiri nokemisantakaayetaimiri Awinkatharite Jesucristo? Kyaaryooperowa jiroka, ashi owaatyero kiteesheriki ikowitzi ritsitokaitena. ³² Ari okantakari eejatzi nisaiki Efeso-ki, ikoshekawaitakena katsimawaitatsiri. Eerome añaayetaime, nontsipataiyaarime iriroripaini, nonkantawaitashitakyaame: Thame anintaawaitawakya, owawaitya, irawaite, oimoshirenkawaitya. Aamaashitya iroowa ankame.

³³ Iroowa paamaantyaawori jiroka otzimikari piyenakaashitanewo. “Eero pitsipaminthatari kaariperori, pimatzirokari eeroka.”

³⁴ Pinkenkithashiretaiyaani kameethaini. Eero pitzipinawaitashita. Aamaaka eenitatsi tsika pikaaataiyini kaari yotakoperotairine Pawa. ¡Kaaniwentaantsi inatz!

³⁵ Aamaaka eenitatsi janta kantashiretatsine: “¿Tsikama inkeneka impiriintai tonkitsipooki? ¿Tsikama onkantaiyaaka iñagaitairo iwatha?”

³⁶ ¡Masontzí! Kantacha oshiyakaawentero jimpe okantaganki okithoki pankirentsi. Ipathaakitzi okithoki inkitakiiakerorika, ari ishookairi. ³⁷ Jiroka okithoki pipankitapiintziri apakithowoini okantaweta, iro kantacha ishookanakerika, inashiwantanakya. Tema te pipankitapiintziro ishookimaterika pankirentsi.

‡ ³⁸ Iri Pawa shookakaayetzirori, otzimayetantari owatha ikowiri irirori. Iriitake inashitakaayetawori rishookakaayetzirori, okaatzi tzimatsiri otsipapaini pankirentsi. ³⁹ Maawoini akaatzira

‡ ^{15:37} Kantakotachari jaka “pankirentsi”, irootake trigo, eejatzi okaatzi oshiyayetawori.

otzimayetzi awatha, te ari oshiyawakaiyani. Thame oshiyakaawentawakero: Aakapaini atziritzira anashiyeta awathaki, inashita iwatha piratsi, shiwankiri, eejatzi ñaaweri. ⁴⁰ Eejatzi ikantayeta inkiteweri te roshiyayetai akantayetaga aakapaini asaawikiweritzira. Otzimimotziri inkiteweri rowaneenkawo, te roshiyawo owaneenkawo aakapaini. ⁴¹ Tema inashita eejatzi rowaneenkawo ooryaa, rowaneenkawo kashiri, eejatzi rashí impokiro paini. Eenitatsi apawopaini impokiro kaari oshiyayetyaarine itsipa.

⁴² Ari ankantaiyaari aakapaini añaayetairika. Tema ikitatapiintaitziro awatha, ari oshitzitziri, iro kantacha arika rowañagaitai, inashitaiya awatha eero oshitziwaitai. ⁴³ Arika inkitaltero awatha manintaarewo inatzi. Iro kantacha, arika rowañagaitai paata, owaneenkataiya awatha. Te aawyaawainete iroñaaka awatha, iro kantacha arika rowañagaitai paata ontzimai oshintsinka awatha. ⁴⁴ Okaatzi ikitaitziri awatha tzimawetacha ashire. Iro kantacha arika rowañagaitairo awatha, ari ontzimayetai atasorenka. Ari ikantayetari maawoini añaayetziri iroñaaka otzimi ishire, iro ayotantayetari eenitatsi otsipa awatha tasorentsitaatsine. ⁴⁵ Ari okanta rosankenatakoitziri Adán, etanakawori atziri, ikantaitzi:

Iri etanakawori rañaanake, ikanta otzimanake ishire.

Iriima jirika oyaatapaakerine oshiyapaakyaaarine, otzimimotziri irirori itasorenka, iriitake añaashiretakaantatsine. ⁴⁶ Ari akantayetari. Te otzimimowetai atasorenka ketziroini.

Iro etanakawo otzimawetaka ashire, iro kantzimaitacha paata ontzimayetai atasorenka.

⁴⁷ Tema jirika etanakawori atziri, kipatsi ragaitake, riwetsikapithaitakeri. Iriima apitetanaintsiri atziri, inkiteki ipoñaakawo irirori.

⁴⁸ Tsika ikanta riwetsikaitakeri kipatsipitha jirika etakawori, iri oshiyayetaari aakapaini. Iriima inkiteweriite, iri oshiyakariri jirika poñagainchari inkiteki. ⁴⁹ Ari akantayetaari eejatzi aakapaini. Tema oshiyawetakari atzimayetake jirika riwetsikapithaitakeri kipatsi, aritake oshiyayetaiyaari eejatzi jirika poñagainchari inkiteki.

⁵⁰ Iyekiite, jiroka okantakota okaatzi nokantakeri: Eero okanta risaikayetai tsika ipinkathariwentantzi Pawa ikaatzi tzimayetatsiri iwatha, riraa, shitzitaatsine iwatha. Iriira saikayetaatsine janta inkaate kaari shitziyetaatsine iwatha.

⁵¹ Pinkeme, nonkamantemiro kaari riyyotakoyeetzi pairani. Jiroka: Ari impashinitakaayeetai maawoini aakapaini. Iro kantacha eero añaayetziro maawoini aakapaini amakoryaayete.

⁵² Paata weyaantapaakyawone kiteesheri, omapokashitaiya rityootaitapai. Apa onkantapaintya ariwaitake amachookapainte. Ari rañaayetairi kamayetaintsiri, rañaantaiyaawo wathatsi kaari shitzinetatsine. Irooma maawoini aakapaini añaayetzika, ari impashinitakaayeetai.

⁵³ Okaatzi awathatari iroñaaka shitzitatsiri, impashinitakaitiro eero oshitziwitantaawo. Akaatzi akaamanewaitzi iroñaaka ari impashinitakagaitai, kañaane ankantayetaiya.

⁵⁴ Arika imonkaatakya paata jiroka, arira

imonkaataiya eejatzi roshiyakaawentaitakero “Kaamanetaantsi”, ikantaitake: Thonkaawowa iititziri “Kaamanetaantsi”, roitsi-nampagaitairo.

⁵⁵ ¡Kaamanetaantsí! ¿Kantachama poitsinampaantai eeroka iroñaaka?

¡Kaamanetaantsí! ¿Tzimatsima iroñaaka pithoyeni?

⁵⁶ Okaatzi oshiyakaawentachari jaka othoyeni, irootakera kaariperotaantsi. Irootake Inintakaantaitanewo iyotakairi eenitatsi ayenakaashitanewo. ⁵⁷ Iroowa niwetharyaantaariri Pawa, tema iri matakagairori aakapaini oitsinampaantaawori, rotyaantakairi Jesucristo roitsinampaantaawori “Kaamanetaantsi”.

⁵⁸ Iyekiite, ontzimatye pinkyaaryootapiintayetai, pantawaitapiintainiri Awinkatharite. Tema piyatira te paminaashiwaita, iriira Awinkatharite matakagaimirori.

16

Koriki rotyaantaitziniriri roiteshiretaitairi

¹ Iroñaaka nosankenatakoteri apiyotziri koriki otyaanteniriri ikaatzi roiteshiretaitairi. Nonkamantemiro okaatzi nokamantakeriri Galacia-satzi. ² Arika papatotapiintaiyaani, ontzimatye pookayete eepichokiini tzimimotzimiri. Eero nopankenatantapaakawo naaka, nareetapaakemirika pinampiki. * ³ Arika nareetakemi kantacha pamine aanakerine koriki janta Jerusalén-ki intsipataanakero

* **16:2** Kantakotachari jaka “papatotapiintaiyaani”, irojatzi ikantaitzitari “etapiintawori kiteesheri awisayetzira tominko.”

nosankenarepaini. ⁴ Ari nontsipatanakyaari niyaate naaka janta, añaawakero ari nimatakero.

Ikenkithashiretari ranteri Pablo

⁵ Eerowa nareetzitzimi, tema netapaintatyeeyaawo niyaate Macedonia-ki, irojatzi nimpoitantapaakyaaawo pinampiki.

⁶ Arika nareetapaakemi, aamaaka osamani nisaikimotanakemi, ari nonkyaaawontsitakote. Irojatzi potyaantantainari tsikarika nokowiro niyaate. ⁷ Te nokowiro naaka eepichokiini onkantya nareetemi. Iriirika Awinkatharite shinetenawone, osamani nisaikimowaitapaintemi. ⁸ Ari nisaikawake jaka Efeso-ki, irojatzi areetantakyaari kiteesheri roimoshirenkaitzirowa “Owiitaantsi”. †

⁹ Iroowa nimatantyaawori jiroka, tema tzimatsi jaka osheki nantawaitainiri Awinkatharite, kameetha okanta noñaakero. Tzimake osheki koshekaminthatakenari.

¹⁰ Arika rareetakyaame Timoteo, paakameethatawakeri, tema irijatzi antawaitainiriri Awinkatharite, ari roshiyana naaka. ¹¹ Te onkameethate intzimayete janta manintawaiterine. Iro kameethatatsi paapatziyawakyaari, irojatzi ripiyantaiyaari naakaki. Tema oyaawenta nowakeri ripoke intsipayetakyaari itsipapaini Iyekiite.

¹² Iriima iyeki Apolos, nokantakeri intsipatanakyaari ikaatzi notyaantaimiri eerokapaini. Iro kantacha te ikowi riyaate irirori. Añaawakeroota arika rimatakero paata.

† **16:8** Kantakotachari jaka “Owiitaantsi”, irojatzi ikantaitzitari “Pentecostés”.

Weyaantawori wethataantsi

¹³ Paamaawentaiya eerokapaini,
poisokerotyaawo pikemisantanakeri,
shirampari pinkantanakya, pishintsishireyete.

¹⁴ Etakotanewo pinkantawakaiya, paap-
atziyawakaantaiyaawo oitarika.

¹⁵ Iyekiite, piyotziri eerokapaini saika-
pankotziriri Estéfanas, iriiyetake etanakawori
ikemisantanake pinampiki Acaya. Ikamai-
tanaawo iriroripaini rantawaiwentanairi
roiteshiretaitairi. ¹⁶ Noshintsineentemi
eerokapaini pinkemisantairi iriroripaini, ari
poshiyaari eejatzi itsipatakari rantawaitaiyini,
kamaitanaawori. ¹⁷ Osheki nokimoshiretake
noñaakero rareetakena Estéfanas, itsipatapaakari
Fortunato, eejatzi Acaico. Iriitake owakowenta-
paakemiri eerokapaini tera onkantya pareetaina
jaka, ¹⁸ potapishiretantenari. Iriiyetake
otapishiretapaakemine eejatzi eerokapaini janta.
Pimpinkathayetawairi.

¹⁹ Riwethayetzimi apatowentapiintakariri
Pawa jaka Asia-ki. Riwethatzimi eejatzi
Aquila eejatzi Priscila. Riwethatzitzimi eejatzi
ikaatzi piyowentapiintakariri Pawa ipankoki.
²⁰ Riwethatzitzimi eejatzi itsipa iyekiite. Etako
pinkantya piwethatawakaayetaiya.

²¹ Jiroka, naakaga osankenatajaantakerori
nakoki, niwethatzimi. Naakatake Pablo.

²² Rowasankeetairi kaari nintayetairine
Awinkatharite. Ripiyitaiya intsipaite
Awinkatharite. ²³ ¡Onkamintha ineshi-
ronkayetaimi Awinkatharite Jesucristo!

24 Netakotzimi maawoini eerokapaini, iri Cristo Jesúš matakainawone. Ari onkantaitaatyeeyaani.

**Kameethari Ņaantsi: ikenkitha-takoitziri
awinkatharite Jesucristo; Owakerari
aapatzia-wakagaantsi**

**New Testament in Ashéninka, Ucayali-yurúa
(PE:cpb:Ashéninka, Ucayali-yurúa)**

copyright © 2000 Wycliffe Bible Translators, Inc.

Language: Ashéninka, Ucayali-yurúa

Translation by: Wycliffe Bible Translators, Inc.

Ashéninka, Ucayali-yurúa [cpb], Peru

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ashéninka, Ucayali-yurúa

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files
dated 29 Jan 2022

03413587-4161-5845-9f63-68583816dfcd